

# الخروج عن النص

أحمد نبيل

"ضحكنا على الماضي البعيد وفي غد..  
ستجعلنا الأيام أضحكة الآتي"

الشابي

## الشخصيات

الراوي	:	صوت خارجي.
برناردو	:	ممثّل صعلوك يؤدي دور آدم.
مارسيل	:	ممثّل صعلوك يؤدي دور حواء.
ميشيل	:	فتاة متشرّدة.

تدور أحداث المسرحية في باريس  
خلال القرن الثاني عشر الميلادي

## الجنة

(المسرح مظلم، أجراس كنائسية تستمر لفترة ثم تهدأ تدريجياً، يضاء  
عمق المسرح على مستوى مرتفع يمثل صورة مصغرة للجنة، برناردو في هيئة  
آدم يجلس في ظل شجرة تفاح أحمر)

الراوي : جَبَلَ الرَّبُّ إِلَهُ آدَمَ مِنْ تَرَابِ الْأَرْضِ.. وَنَفَخَ فِي  
أَنْفِهِ نَسَمَةَ حَيَاةٍ.. فَصَارَ نَفْسًا حَيَّةً.. وَأَقَامَ الرَّبُّ  
الْإِلَهَ جَنَّةً فِي شَرْقِيِّ عَدْنٍ.. وَوَضَعَ فِيهَا آدَمَ..  
(برناردو يبدو عليه الملل، يتسلى ببعض الألعاب  
الطفولية البلهاء)

الراوي : ثُمَّ قَالَ الرَّبُّ إِلَهُ: لَيْسَ مُسْتَحْسَنًا أَنْ يَبْقَى آدَمُ  
وَحِيدًا.. وَكَانَ قَدْ جَبَلَ مِنَ التَّرَابِ كُلِّ وَحُوشِ  
الْبَرِيَّةِ وَطُيُورِ الْفُضَاءِ وَأَحْضَرَهَا إِلَى آدَمَ لِيَرَى  
بِأَيِّ أَسْمَاءٍ يَدْعُوهَا..

برناردو (يتطلع لصالة المسرح) غزال.. حمار.. فيل بزلومة..

الراوي غير أنه لم يجد لنفسه مَعِينًا نَظِيرَهُ.. فأوقع الإله

أدم في نوم عميق.. ثم تناول ضلعًا من أضلاعه..

وعمل من هذه الضلع امرأة أحضرها إلى آدم..

(يظهر مارسيل في هيئة حواء تصاحبه موسيقى

البلوز وهو يتقدم من برناردو محاولاً إثارة كعاضات

الاستريبتيز وبرناردو يتراجع في ذهول حتى يسقط

أمامه على الأرض كالثريسة، يظلم المسرح)

الراوي لهذا فإن الرجل يترك أباه وأمه ويلتصق

بأمراته.. ويصيران جسداً واحداً..

(يضاء المسرح على برناردو ومارسيل يلعبان لعبة

"صلح"، برناردو يولي ظهره لمارسيل الذي يضربه،

ثم يستدير ويهرش رأسه مذكراً للحظات، وأخيراً

يشير نحو مارسيل بدهاء كأنه تعرف على من ضربه،

يتبادلان المواقع ويتكرر نفس الفعل مع اختلاف

الأدوار، برناردو يصطحب مارسيل إلى مقدمة المسرح

ويبدأ في تعليمه الأسماء والأخير يردد وراءه وهما

متطلعان لصالة المسرح)

برناردو : غزالٌ ..

مارسيل : غزالٌ ..

برناردو : حمارٌ ..

مارسيل : حمارٌ ..

برناردو : سيد قشطة ..

مارسيل : سيد قشطة ..

برناردو : انظري ما صنعت يد الرب الاله .. مثل هذا الجمال  
لا تصدقه عين .. نهار وليل .. ماء ويابس ..  
غابات من الأشجار الظليلة تسبح في وداعة ..  
فضاء مرصع بالنجوم الوضيئة .. وشمس  
لا تتخلف عن زيارتنا يوما .. لا أكاد أصدق أن  
هذه الجنة ستكون عشنا للأبد .. (يتنقل في  
الأرجاء) هنا حيث نتناول إفطارنا مما تجود به  
الأرض كل صباح .. وهناك بين الكروم مطارح  
غناء للهو والغرام .. ومن هذا المرتفع يمكننا  
الاستمتاع بمشاهدة استعراضات "الدلافين"  
في نهاية كل أسبوع ..

مارسيل :

حقا يا آدم.. هذا المكان هو النعيم الأبدي الذي  
كتبه لنا الرب الإله.. الآن لا ينقصنا سوى غسالة  
الأطباق!! فقط لو...

برناردو :

(مقاطعا) إياك أن تستخدمني هذه الكلمة.. فإن  
كلمة لو تفتح للشيطان ألف باب..

مارسيل :

أعدك أنها لن تتكرر..

برناردو :

(مداعبا) ولو تكررت؟!...

مارسيل :

ماذا؟!...

برناردو :

عذرا.. ما كان يجب أن أتفوه بهذه الحماقات  
ولو على سبيل الهزار!!

مارسيل :

(بتحذير) هششششششش..

برناردو :

يوووووه... ها أنا أتورط في الخطيئة مرة  
أخرى.. عفوا أيها الرب الإله.. ولتحل بي  
اللعنات لو فعلتها مجددا.. (يضحكان، ترتفع من  
مكان بعيد صيحة طائر)

مارسيل :

آدم.. أسمع صيحة الشحروور؟..

برناردو : (في سعادة) آآآآه.. ما أعذب هذا الصوت..

(يستدرك) ولكنها صيحة العندليب..

مارسيل : بل هو الشحرور.. فإن أذني لا تخطئه..

برناردو : حوا.. إنه العندليب..

مارسيل : شحرور..

برناردو : عندليب..

مارسيل : شحرور..

برناردو : عندليب..

مارسيل : شحرور..

برناردو : لقد علمتك الأسماء كلها.. فلا تجادليني عندما

أخبرك أنه العندليب..

مارسيل : القمر يكتمل..

برناردو : (بحماس) يالروعة.. إن قلبي أضعف من أن

يحتمل مثل هذا البهاء.. يريد أن يقفز من بين

أضلاعي ليعانق السحاب..

مارسيل : ذات مساء سنجلس فوق تلك الرُبي لنحصى

ما مر من عمر جميل.. وبعد أن تحمل كل هذي  
الأشجار تذكاراتنا حتى لم يعد عليها متسع  
لنقش تذكارات جديدة.. يومها من الممكن أن  
نفكر في الرحيل من هذا المكان.. وفي نقش  
تذكارات جديدة على وجه القمر..

أيأتي حقا ذلك اليوم؟!!

برناردو

لا أعرف.. (لحظات صمت) لكنني على يقين أنه  
الشحور!!

مارسيل

(يطفو صوت الراوي على المشهد ويظلم المسرح  
تدرجيا بشكل يعبر عن مرور زمني)

وأمر الرب الإله آدم : كُلْ ما تشاء من جميع  
أشجار الجنة.. ولكن إياك.. إياك.. إياك أن تاكل  
من شجرة معرفة الخير والشر.. لأنك حين تاكل  
منها حتماً تموت..

الراوي

(يضاء المسرح لنرى برناردو ومارسيل جالسين كما  
هما، وقد طالت لحية برناردو وشعره، يبدو عليهما  
الملل، برناردو يلقي بالحصي بعيدا في رتابة، ومارسيل

ينظف أظافره بورقة شجر)

مارسيل : صباح جديد..

برناردو : (يتمطى) ربيع دائم يتجدد.. (نسمع صيحة الطائر)

مارسيل : لقد عاد الشحرور للغناء.. أتسمعه؟..

برناردو : (متثابها) آآآآآ.. ما أعذب هذا الصوت.. سنون  
مرت وأنا أخبرك أنه العنديل..

مارسيل : بل هو الشحرور.. فإن أذني لا تخطئه..

برناردو : حوا.. إنه العنديل..

مارسيل : شحرور..

برناردو : عنديل..

مارسيل : شحرور..

برناردو : عنديل..

مارسيل : شحرور..

برناردو : (بتسليم) طيب !

مارسيل : الشمس تنهاري ..

برناردو : (بوهن شديد) يا...!...!...! لروعتها.. إن قلبي  
أضعف من أن يحتمل مثل هذا البهاء.. يكاد  
يقفز من بين أضلاعي..

مارسيل : آدم..

برناردو : هممممم!!

مارسيل : ألم تفكر من قبل فيما وراء تلك التخوم المسيجة  
بالشجر!!

برناردو : .....

مارسيل : ترى ماذا هناك!!

برناردو : شجر!!

مارسيل : وماذا بعد؟..

برناردو : مزيد من الشجر!!

مارسيل : كأننا ندور في حلقة مفرغة.. الأمر يبدو وكأن  
هذه الجنة تبدأ من حيث تنتهي.. أرض مستديرة  
معلقة في الفضاء تماما مثل هذه التفاحة..

( تقطف تفاحة من الشجرة وتهم بقضمها )

الراوي : ( بنبرة تحذير ) هااااااه.. وأمر الربُ الإلهُ آدمَ :  
إياكَ.. إيااااا.....

برناردو : ( ينتبه مذعورا فيخطف التفاحة ) كلا... اتركها  
يا حوا..

مارسيل : لماذا؟..

برناردو : قلت مرارا إن ثمار هذي الشجرة غير صالحة  
للأكل..

مارسيل : ولماذا؟..

برناردو : ( يلقي بالتفاحة أرضا ) لأنها قد تتسبب لنا في  
موت محقق..

مارسيل : فكر قليلا قبل أن تتكلم يا آدم فقد يمس كلامك  
الرب الإله بسوء..

برناردو : لا أفهم كلامك..

مارسيل : كيف للرب الإله أن يقضي بموتنا.. بعد أن  
خلقنا في أحسن تكوين ومنحنا من روحه نسمة

الحياة وأوانا في جنته دون غيرنا... لقد صنعها  
من الطين يا آدم... فكيف تفكر أن الرب الإله يقدم  
على عمل كهذا... وإن أراد لفعلها في غمضة  
عين... دون حاجة إلى تقاح مسموم...

بيرناردو : ولكنه حذرنا من أن تقرب هذه الشجرة بالذات...

مارسيل : ولماذا يضعها في طريقنا من الأصل؟ وفي  
وسط جنته تحديدًا؟ "راكور"!!!

بيرناردو : أعتقد أنه اختبار ما...

مارسيل : ولماذا؟

بيرناردو : حوا... سنعتقد صفقة جديدة... من اليوم يمكنك  
أن تستخدمني كلمة أو كيفما شئت ولكن أرجو  
أن ترحميتي من كلمة لماذا!!

مارسيل : ولماذا علمتني الكلام إذن؟...

بيرناردو : (بنقاد صبر) أوووووووه... ولماذا تلاحقيني

دوما بأسئلتك الحمقاء؟... ولماذا أمنعك من

التهام تفاحة إن لم يكن خوفًا على حياتك؟...

ولماذا لم تعد عيناك قادرتين على رؤية أي شيء؟

من الجنة الواسعة سوى هذه الشجرة بالذات؟  
لقد أمرتك ألا تقربي الشجرة وكفى.. فلماذا لا  
تطيعينني؟

مارسيل : تذكر أننا شركاء في هذه الجنة..

برناردو : بل حراس عليها..

مارسيل : كل هذا من أجل شجرة تفاح؟

برناردو : إنها ليست شجرة تفاح.. (يمس بطريقة

توحي بخطورة الموقف) إنها شجرة معرفة الخير  
والشر..

مارسيل : وماذا يكون الخير والشر؟!

برناردو : وكيف لي أن أعرف... ما أعرفه حق المعرفة أن  
الموت يسكن هذه التفاحة..

مارسيل : (ينتهز فرصة انشغال برناردو فيلتقط التفاحة

من الأرض وينظفها) إذن فالمعرفة قد تكلف المرء  
حياته (يقضم التفاحة)

برناردو : (يصرخ ويهرع لتجدة مارسيل) حواااا... (يحملة

ويهرزه بين يديه يعنف دونما يعطيه الفرصة للكلام)  
كلا يا حرا.. لن تموتي.. لن أدع سم العرقة  
يسري في عروقك.. لن أعيش وحيدا مرة  
أخرى..

مارسيل : (يحاول توضيح الأمر) آدم...

بيرناردو : (مقاطعا) لا تتكلمي.. أعرف ما يدور بخاطرك  
لن تموتي ولو وهبتك ما تبقى من عمري..

مارسيل : اطمئن يا آدم...

بيرناردو : (باكيا) ستعيشين حتى تبلغ القمر ونحفر عليه

السمائمنا.. سنظل يا حبيبتي عشاقين للأبد..  
وسنذهب لقضاء العطلة الصيفية على شاطئ  
القرات.. وسنشترى غسالة الأطباق.. ولكن لا  
تتركيني.. لا تتركيني..

مارسيل : انتظر يا آدم...

بيرناردو : (صارخا) لن أنتظر بعد الآن.. فإذا كان الموت

خاطفك مني.. فلنحيا معا أو نموت معا.. (يلتهم

بأقي التفاحة)

الراوي : وعندما أكلَ الاثنانِ من ثمارِ الشجرة.. انفتحت  
أعينُهُما.. وأدركا أَنهما عريانان.. (في لحظة  
واحدة برفارديو يترك مارسيل يسقط على الأرض  
ويشيق كل منهما في خجل مديرا عينيهِ عن الآخر)

الراوي : ثم سَمِعَ الزوجانِ صوتَ الربِّ الإلهِ فالختيا..  
(يتصاعد صوت رياح، يخبث برفارديو خلف مارسيل  
في دعر)

الراوي : فتأدى الربُّ الإلهُ : آدم.. أين أنت؟.. هل أكلتَ  
من الشجرة التي نهيتك عنها؟..  
(برفارديو ما زال محتبئا خلف مارسيل لكنه يرفع  
إصبعه بطريقة طفولية ويشير نحو مارسيل  
بالاتهام)

الراوي : لأنك أذعنتَ لقولِ امرأتِكَ وأكلتَ من الشجرةِ  
التي نهيتك عنها فالأرض ملعونةٌ بسببك..  
وبالمشقة تقاتُ منها طوالَ عمرك.. شوكا  
وحسكا تُنبِتُ لك.. حتى تعودَ إلى الأرض..  
فمن ترابٍ أخذتَ.. وإلى ترابٍ تعودُ..

(يتصاعد صوت الرياح أكثر مع موسيقى روحانية  
مهيبه وتعود الأجراس الكنائسية، مارسيل وبرناردو  
يحاولان الاختباء من الرياح فيتراجعان إلى مقدمة  
المسرح تدريجيا بينما تظهر بوابة ضخمة من جانبي  
المسرح تغلق أمامهما ببطء حتى تحجب الجنة  
تماما عن الرؤية، نلاحظ أن البوابة ضخمة نوعا ما  
وعليها نقوش سماوية وأعلىها صليب كبير مثل بوابة  
كاتدرائية)

إظلام

## الشارع

(البوابة مغلقة كما هي، في مقدمة المسرح عامود إنارة ورصيف شارع.

نسمع ضحكات برناردو ومارسيل من الداخل، ثم يظهر الاثنان يملايسهما

الحقيقية وشعورهما المستعارة التي تعود للطراز الفرنسي بالقرن الثاني

عشر، يخرجان من بوابة الكاتدرائية، كل منهما يحمل على كتفه حقيبة)

برناردو : ولسه.. بكرة العالم كله هيتفرج علينا.. روما

ولندن وبرلين وكله..

مارسيل : وماله؟.. ركك بس نبيع العشروميت فدان بتوع

أمك ويا فكك..

برناردو : من غير نأورة.. هنسافر.. وهنمئل.. وهنعلق

نسوان الدنيا كلها.. وبكرة تقول برناردو قال..

مارسيل : وحضرتك بقى اللي هتعرز منا؟!..

برناردو : الكنيسة وحياتك..

مارسيل (يخرج زجاجة صغيرة من الحقيبة) اللي هيجنني

إن أنا اللي باشرب وانت اللي دماغك بتلق...

(يشرب جرعة)

بيرناردو مش قلنا ميت مرة بلاش الهباية دي هنا.. لو

اتقفشت هيعلقونا.. (يخطف الزجاجة ويأخذ

منها جرعة)

مارسيل اتطمئن.. مافيهاش تفاح !!

بيرناردو ومايسفروناش على حسابهم ليه؟.. عيلاقوا فين

ممثلين أحسن مننا ينشروا أفكارهم في العالم؟..

مارسيل يعني كل المبشرين اللي عدوا من بطرس وانت

تازل دول عشر مالمين عيمك.. واحنا بقى اللي

هنجيب الشعب من ديله؟..

بيرناردو زمان واحنا عيال صغيرين كانوا بيقلولوا لنا إيه

في القداس؟..

مارسيل حاجات كتير..

بيرناردو أنا باسأل على حاجة واحدة م الحاجات الكتير..

أهم حاجة..

مارسيل

مش فاكّر..

برناردو

بالظبط.. ودا الفرق بين القداس والمسرحية..

مافيش حد بيخرج م المسرح ناسي اللي شافه.. حتى لو كان مسرح درجة عشرة..

في القداس فيه كلام عن الخير والشر.. وطبعاً

الخير لازم ينتصر في نهاية الوعظة.. لكن ع

المسرح الخير والشر بيشغلوا حيز م الفراغ..

تلاقي الواحد منهم عافق الثاني من قفاه وهاتك

يا ضرب وخبط ورزّع.. عاركة ما تحصلش

ولا في حوار مارسيليا.. والخير ماسك في

خناق الشر وبيعافر.. واحدة تصيب وعشرة

تخيب.. عشان كذا المسرح والكنيسة كان لازم

يتصالحوا على بعض..

مارسيل

من شققة لطوية.. هتفضل أفكارهم أفكارهم

هنا وهناك.. وهيفضل برناردو ومارسيل هما

برناردو ومارسيل..

برناردو

عايز تقول إيه؟..

مارسيل : عايز أقول ان اللي بندور عليه لا عند دول ولا دول.. اللي بندور عليه موجود هنا (يشير الى رأسه) عمرك ما سألت نفسك إيه اللي ممكن يحصل لو في يوم بطلنا نمثل آدم وحواء..

برناردو : (متفكرا) هيحصل.. هيحصل...

مارسيل : ولا أي حاجة.. هيفضل آدم وحواء هما آدم وحواء.. حكاية قديمة ومحفوظة.. اللي مش هيشوفها ع المسرح هيقرأها في سفر التكوين..

برناردو : تصدق فكرة.. إيه رأيك لو مثلنا قابيل وهابيل؟..

مارسيل : موجودة في نفس السفر..

برناردو : آمال عاوزنا نمثل للناس إيه؟.. برناردو

ومارسيل؟

مارسيل : مين عارف.. مش جازي في يوم م الأيام نبقى

مهمين و نتعمل عننا مسرحية.. ولحد اليوم دا

ما يبجي محتاجين نعمل حاجة كبيرة.. حاجة

بجد..

برناردو : زي إيه؟..

- مارسيل : آدم وحواء..
- برناردو : مارسيل.. انت شربت كثير..
- مارسيل : كل المسارح اللي قدمت آدم وحواء ما خرجتش  
من عباية الكنيسة.. انظروا ما صنعت يد الرب  
الإله.. نهار وليل..
- برناردو : ماء ويابس..
- مارسيل : غابات من الأشجار الظليلة..
- برناردو : فضاء مرصع بالنجوم..
- مارسيل : وشجرة وتفاحة وهم يا جمل.. وبراء.. براء..
- برناردو : برا الجنة.. وبعدين؟..
- برناردو : ولا قبلين..
- مارسيل : طب تفتكر إيه اللي كان ممكن يحصل لو آدم  
وحوا غلطوا في الشجرة؟!
- برناردو : ولا أي حاجة.. مافيش تفاح.. مافيش خروج م  
الجنة.. مافيش دراما..
- مارسيل : بالعكس.. ماتنساش إن شجرة الحياة كانت

على بعد خطوتين من شجرة المعرفة.. تفاحة  
واحدة من شجرة الحياة ويتكتب لهم الخلود  
للأبد.. مع ذلك ما حاولوش حتى يقربوا منها..

بيرناردو : ضربة حظ يمكن.. ويمكن كانوا عارفين إنهم لو  
كلوا من شجرة الحياة..

مارسيل : هيبجي يوم يتمنوا فيه الموت ومش هيطولوه..

بيرناردو : ويعرفوا منين؟.. ماتنسااش إنهم لسه ماكلوش  
من شجرة المعرفة..

مارسيل : غلب حماري..

مش يمكن لأن دا كان هيغير حركة التاريخ..  
لو آدم وحواء أدركوا الخلود ساعتها العالم  
كله بالنسبة لهم هيفقد معناه.. الخير.. الشر..  
الحياة والموت.. حتى الجنة هتفقد معناها..  
وبالتالي التمرد عليها والخروج منها..

بيرناردو : يا ابن اللعيبة..

مارسيل : ولسه.. خد عندك.. حوا وادم في القرن الـ 12..  
لابسين باروكات.. راكبين حناطير.. حاطين

برفانات.. لسه بيكتشفوا العالم.. الجنة كانت  
أول درس اتعلموا فيه الأسماء.. ودلوقتي  
بيكتشفوا معاني الأسماء.. يعني إيه حب؟..  
يعني إيه غيرة؟.. يعني إيه ضرايب ودولة  
وشغيلة ونبلاء؟.. يعني إيه أزمة منتصف  
العمر؟.. شخصيات من لحم ودم.. مش أيقونة  
على باب كنيسة..

برناردو : لالالالالا.. دا احنا كدا نتضرب بالجزم..

مارسيل : ما احنا كدا بنتضرب بالجزم..

برناردو : أيوه بس كدا الجزم هتزيد..

مارسيل : لأن الجمهور كمان هيزيد.. النهاردة نتضرب  
ونتشتم.. بكرة نتشتم وبس.. بعد بكرة الناس  
تتعود ع الفكرة ويعملوا لنا تماثيل ذهب..

برناردو : ومين المهفوف اللي هينتج مسرحية زي دي..  
حضرتك؟

مارسيل : الكنيسة وحياتك (يتجه إلى باب الكاتدرائية  
هيستوقفه برناردو)

هتعمل إيه يا مجنون؟

برناردو

هاعرض الفكرة عليهم.. أنا مش هاستنى لحد  
ما الفكرة تتشيط ونلاقي حد بيقدمها قبلنا..  
في روما في برلين في لندن.. أكيد فيه مليون  
مارسيل بيذكروا.. ومافيش غير مارسيل  
واحد هو اللي هيسبق.. أنا (ينطلق مرة أخرى  
تجاه البوابة فيستوقفه برناردو)

مارسيل

استنى بس يا مارسيل.. لو الفكرة فكست  
عيشنا هيتقطع وهيرمونا في الشارع..

برناردو

ولو ما فكستش؟

مارسيل

دي تبقى معجزة.. لكن....

برناردو

برناردو.. الفرصة بتيجي مرة واحدة في  
العمر.. خبطة واحدة ويا قاتل يا مقتول.. فلنحيا  
معا أو نموت معا..

مارسيل

انت بتتكلم جد..

برناردو

(يعبر مارسيل البوابة بتصميم، ثم يلحق به برناردو،  
يخطفان بالداخل وتمر لحظات، ثم تفتح البوابة

ليظهر الاثنان مقتدوفين للخارج وخلفهما الحجاب  
بشكل يعبر عن طردهما من الكاتدرائية)

مارسيل : (يوجه حديثه للبوابة) انتوا الخسرانين.. وبكرة  
هتجروا ورانا..

برناردو : بكرة يجروا ورانا بالشياشب والطوب.. أنا اللي  
استاهل اني لغيت عقلي وفكرت بدماغك..

مارسيل : انت حر.. اتفضل.. روح فكر بدماغهم..

برناردو : ما عايش ينفع.. ما اتكشحننا واللي كان كان..  
أهو لا بقى فيها جنة ولا أرض..

مارسيل : هتفضل طول عمرك تبص تحت رجلك..

برناردو : أنا مش فاهم.. إزاي وافقتك ع الفكرة الهباب  
دي؟.. إزاي سبتك ترمي كل أحلامنا في  
الزبالة.. مجهود عشر سنين بروفات وسهر  
وصياغة وتشرد كله اتهدّ في لحظة.. يعني  
خلاص؟.. مافيش شهرة؟.. مافيش مجد؟..  
مافيش نسوان؟!..

مارسيل : بالعكس.. دلوقتي الفرصة جت لحد عندنا

ومن أوسع الأبواب.. الشارع هو أنسب مكان  
لفكرتنا..

قصداً لفكرتك المنيلة..

برناردو :

أكيد حوا وأدم خرجوا من الجنة للشارع.. مش  
للكنيسة..

مارسيل :

هو ذا المكان اللي يليق بأمثالك.. مع الجوالين  
والشحاتين وولاد الـ...

برناردو :

(مقاطعا) لو مش عاجبك فضها سيرة.. وكل  
واحد ينام ف الشارع اللي يريحه..

مارسيل :

(بعد لحظات تفكير) ولو عاجبني.. انت فاهم إن  
التمثيل في الشارع حاجة سهلة؟..

برناردو :

(يفني) في البدء كان الشارع الواسع تياترو  
كبير..

مارسيل :

أنا باتكلم جد..

برناردو :

(يفني) بين السما والأرض بدأ العرض للعمامة..  
في البدء كان الفن م الجماهير.. وللجماهير..

مارسيل :

برناردو : ما فكرتش هناكل منين؟ .. هنشرب منين؟ ..

مارسيل : (يغني) خلقوا الحياة م العدم ..  
والنور من الضلمة ..

برناردو : (يشترك في الغناء)

في البدء كان الجوع ..  
وشكله هيبقى ف الآخر ..

مارسيل : لولا تراجيديا الجوع ..  
ما كانش المسرح الساخر ..

برناردو : في البدء كان الجوع ..  
وعاش الجوع ف كل زمان ..

مارسيل : زرعوا اليونان الكرّم ..  
من قبل الأوان بأوان ..  
بعث الإله "ديونيس"

سلاماته يا مسارح  
بكثرة النهاردة . اتولد  
و "بلاك" على امبارح  
صبحت اتينا

تَصْبَحُ ع العنب طارح

تسقي العبيد النبيد..

والفرجة بالمجان..

الفن مش عنجهية وجوع

على الفاضي

الفن تحت الطلب

أجرة وملاكي

ورضينا بالفن..

بس مش الفن راضي..

واحنا الفقير الغني..

والضاحك الباكي..

ادم وحواكملوا المشوار

والجنة قدامنا بتلاتة أمتار

حقيقة مش ذكرى..

ف بالي كام فكرة..

تودي على بكرة..

قصداك تودي النار !!

برناردو ،

مارسيل ،

برناردو ،

مارسيل : طب واللي باعوا الحلم للمساكين؟

برناردو : زي اللي باعوا الفن في الدكاكين..

بين خدامين للأباطرة..

وخدامين للدين..

الاثنان : الكل في الفتارين..

بيحطموا الأسعار !!

مارسيل : .....

أنا اللي دوري زهق من كتر تشخيصه..

برناردو : وأنا اللي شخصي زهق من دوره بالتالي..

مارسيل : أنا اللي قلبي يساع الكون ف كواليسه..

برناردو : أمنتُ بالفن من يأسف على حالي..

الاثنان : مشرّدا بين أحلامي وكوايبسه..

مارسيل : "الفنُ أرذلُ مما ليسَ بالأرذل..

برناردو : فلتدلِ بالدلو..

أو فلتدلِ بالجرذل..

إن كانَ عندكَ رأيٌ أو سواهُ فقل

- مارسيل : لكل رأي سواه يا أخا غوكل  
 برناردو : الحظ يطرق بابا ليس يعرفه  
 مارسيل : فافتح له الباب..  
 برناردو : أو فافتح له المنديل..  
 مارسيل : ففتح وفتح تساوي ففتحين وقد..  
 برناردو : يُستطلع الرأي أحيانا ويُستنزل  
 مارسيل : قد كان للأمس يومٌ سابقٌ غده  
 برناردو : وكلُّ قولٍ غريبٌ قبل أن يُعقل  
 مارسيل : والظلمُ ظلمٌ فحسبك تنتظر أظلم..  
 برناردو : والعدلُ عدلٌ فحسبك تنتظر أعدل"  
 (في نهاية الاستعراض يكون الاثنان قد شرعا  
 في إعداد مسرح صغير في الشارع باستخدام بعض  
 الاكسسوارات الموجودة داخل الحقائب)

إظلام

## الأرض

(بؤرة ضوء على برناردو ومارسيل في هيئة آدم وحواء في الجنة يعيدان تمثيل المشهد بالحركة البطيئة "Slow motion" وبطريقة معكوسة "Review" / بداية من نهاية المشهد وصولاً للحظة قطف التفاحة، أثناء ذلك نسمع صوت الراوي)

الراوي : وبعد أن أكل الزوجان من ثمار الشجرة المحرمة.. أدركا أنها لم تكن شجرة المعرفة.. فقد اختلط عليهما الأمر..

(تتحرك شجرة التفاح الأحمر لتراجع خلف باقي الشجر لتتخذ مكانها شجرة أخرى للتفاح الأصفر، يقطف مارسيل تفاحة صفراء، فتنتطلق أصوات صفارات أجهزة الإنذار والشجرة تطلق أضواء متقطعة ثم تنتهي إلى إظلام)

الراوي :

وأكلا من شجرة الحياة بدلا من شجرة المعرفة..  
فكتبت لهما الحياة الأبدية.. ونزلا بسلام إلى  
الأرض يعرفان أن لا شيء في العالم يمكنه  
أن يصيبهما بسوء.. لذا فلم تعد قلوبهم تعرف  
الخوف.. ولقرون عديدة احتفل الزوجان بمرور  
آلاف السنين على زواجهما السعيد..

(إضاءة على كوخ صغير يمثل منزل آدم وحواء على  
الأرض، برناردو في هيئة آدم بعد أن بدا عليه الكبر  
وبدأ يعاني من ملل الخلود، يرتدي ثياب القرن  
الثاني عشر، يستند إلى عكاز حوله عدد لا نهائي من  
الزجاجات الفارغة مرسوم عليها علامة الخطر، وهو  
يشرب من آخر زجاجة ويحدث نفسه )

برناردو :

خيانة.. عشت يا آدم حتى جاء اليوم الذي  
ينصرف فيه عنك الجميع.. إن نفرا من أبنائك  
المنتشرين في بقاع الأرض لم يكلف خاطره  
بالسؤال عن حالك.. حتى حواء شريكة الدهر  
لم تعد على عهدا.. كم واجهت من المتاعب  
والصعاب وحدك حتى تحضر أربعة آلاف

ومئتين وسبعاً وثلاثين شمعة من أنحاء البلاد  
للاحتفال بعيد الزواج السعيد.. وتعود لتجدها  
قد هجرت المنزل.. لقد كلفك ذلك عناء كبيراً..  
(يلقي بالزجاجة بضيق) اللعنة على هذا السم..  
كلما شربت منه أشعر بالتحسُّن.. (مفكراً) لقد  
كان خطوك من البداية يا آدم.. لقد انشغلت  
بالتجهيز للاحتفال أكثر من اللازم وتركت لها  
الفرصة للهروب.. كيف تصل إلى هذه الدرجة  
من الإهمال والخرف؟.. كيف طاوعك قلبك  
أن تأمن على فتاة مثل حواء وحدها في مثل  
هذه الساعة؟.. إنها ما زالت غيرة ولم تتمم  
ألفيتها الخامسة بعد.. ومن الممكن أن تتعرض  
لمضايقات الصبية ورواد الحوانيت.. لكنها في  
النهاية ستعود.. وتلك هي الكارثة.. السم لم يعد  
يجدي.. لا بد من حل آخر.. لا بد من حل آخر..  
لم يعد لحياتك أي معنى.. إذن فلتُمت يا آدم..  
(برناردو يستل سيفاً يطعن به نفسه، يدخل مارسيل  
في هيئة حوا وقد صارت عجوزاً متصابية تبدو عليها

(الثمالة)

الم تكف عن هذه الألعاب؟..

مارسيل :

حلت الكارثة !!

برناردو :

ماذا تفعل أيها الطفل العجوز؟..

مارسيل :

أطلب الموت ولا أنا له..

برناردو :

حسنا.. بعد أن تنظف هذه الفوضى لاتنس

مارسيل :

إطعام الصغار..

أين كنت؟

برناردو :

كنت في الحانة.. أستعيد الذكريات..

مارسيل :

ويحك؟.. في الحانة تحتسين الجعة بين الغرباء..

برناردو :

وتركيني هنا وحدي "أطفح" السم..

(تنفسها) ليته كان فعلا !!

مارسيل :

ماذا؟..

برناردو :

إنهم ليسوا غرباء يا آدم.. كلهم أولادك..

مارسيل :

أولاد الكلاب.. (برناردو يحضر صندوقا به بعض

برناردو :

الكناكيت يضع بهم الحبوب) لم يكلف أحدهم

خاطره بالسؤال عن حالنا منذ قرون..

مارسيل : إنهم ليسوا بحاجة للسؤال عن حالنا .. يعرفون  
أننا لا نموت ..

برناردو : ربما يحققون علينا أيضا .. طالما حلمت بتحويل  
هذه الأرض إلى صورة من الجنة ..

مارسيل : لقد تغيرت الحياة كثيرا يا آدم .. إنه القرن الثاني  
عشر الميلادي .. والعالم يشرع في تأسيس المدن  
والجامعات .. أصبح الإنسان يصارع الإقطاعية  
بعد أن كان يصارع الطبيعة .. ولم تعد الأرض  
ملاذا للحالمين ..

برناردو : نعم .. لم تعد الأرض ملاذا للحالمين .. إذن فلتمت  
يا آدم (يشنق نفسه في حبل لكن الحبل ينقطع  
فيسقط أرضا)

مارسيل : لماذا لا تقتنع أنك لن تموت طالما ما زال مفعول  
تفاحة الخلود يسري في دمك ..

برناردو : حقا .. قضي علي أن أعيش حتى أراك تتركيني  
كالكلب الذليل أتجرع مرارة الوحدة .. ومتى ؟ ..  
في ليلة عيد زواجنا .. أربعة آلاف ومئتان وسبع

وثلاثون شمعة تحترق في مؤخرتي !!

(صارخا) لقد سنمت..

مارسيل ،

سنمت ١٩.. لقد فقدت هذه الكلمة معناها منذ

برناردو ،

قرون.. كم حاولت أن أبحث عن كلمة أكثر

تعبيرا عن مشاعري تجاهك.. بحثت في معاجم

اللغة سنوات وسنوات حتى سنمت !..

لم أعد أحبك..

مارسيل ،

ولم لم تخبريني بهذا قبل أن أحضر الشموع ١٩..

برناردو ،

كانت الفرصة أمامك على مر الزمان..

(بادء قرا جيدي) أريدك أن تعرف شيئا آخر..

مارسيل ،

اليوم وبعد مرور آلاف السنين على زواجنا..

حاولت خيانتك..

(لحظات صمت)

وهل نجحت المحاولة ٩..

برناردو ،

(صارخا) كيف وقد كتب عليّ التعاسة مع عجوز

مارسيل ،

مثلك إلى أبد الأبد ٩.. بأت المحاولة بالفشل

كسائر المحاولات.. الجميع يخشى الاقتراب

مني.. مجرد رؤيتي تثير الهلع في قلوبهم.. لقد  
قضي علينا أن نحيا كالأوثان !!

برناردو ،  
حتى الأوثان يمكنها الحصول على بعض  
القرابين من حين لآخر.. كنت أعتقد في البداية  
أن السعادة في الحياة الأبدية.. كنت أعمى..  
لم أعرف أن الخلود لن يعطيني من آلام الجوع  
والوحدة والبروستاتا.. جوع أبدي.. وحشة  
أبدية.. وانتظار أبدي.. هذا ما جنيناه من  
شجرة الحياة..

مارسيل ،  
مهلا.. إذا كانت الحياة الأبدية هي ثروتنا  
الوحيدة.. فلماذا لا ننتفع بثروتنا؟..

برناردو ،  
لكننا لا نستطيع أن نهب الحياة للآخرين..

مارسيل ،  
يمكننا على الأقل أن نمنحهم البهجة.. سنخرج  
إلى المدينة في ثياب الحواة.. ونقدم للصغار  
بعض العروض البهلوانية.. إذا استطعت أن  
أشترك إلى نصفين بهذا السيف ثم أعيد تركيبك  
مرة أخرى أمام الجميع سيكون عرضا مبهرًا..

سيصاب الجميع بالفرع ..

برناردو :

حسننا .. من الأفضل أن أشعل فيك النيران ..

مارسيل :

أحترق !!

برناردو :

لكنك لن تموت !!

مارسيل :

لكني سأحترق !! هكذا تخططين للاحتفال

برناردو :

بذكرى زواجنا !!

سنجني ثروة في أيام قليلة .. وإذا نجح الأمر

مارسيل :

يمكننا مع الوقت أن نتبادل الأدوار حتى لا

نصاب بالملل .. وهلم " جرجر " ..

سيطاردونتنا يا حوا .. سيضعوننا في المتاحف ..

برناردو :

إنهم لا يصدقون حتى أننا على قيد الحياة .. لم

يرثوا عن أمهم سوى الغباء ..

ولم يرثوا عن أبيهم سوى الكآبة .. لذا علينا أن

مارسيل :

نمنحهم شيئا من المرح ..

( برناردو ومارسيل يقدمان عرضا بهلوانيا ، وتدرجيا

تنهمر عليهما الثمار الفاسدة المقذوفة من صالة

المسرح ، وتتعالى صيحات اعتراضية من الجمهور

“ أوغديو.. أوغديو.. ” Ordures، حتى يحاول

الاثنان الهرب من قذائف الثمار، يعود صوت الراوي)

الراوي :

ولما زاد بُعد التمثيليات عن الكنيسة في  
مناظرها وموضوعاتها.. نزعت هذه التمثيليات  
إلى التهريج والخلاعة والفحش.. وأعلنت  
الكنيسة أن التمثيليات القروية تجافي الأخلاق  
الفاضلة.. ولا يجب على أي مسيحي بار أن  
يشاهدها.. وصدرت أوامر شبيهة بهذا الأمر  
بين عامي 1136 و 1144 تقضي بأن الممثلين  
الذين يشتركون في هذه التمثيليات يحرمون  
من الدين.. (الراوي يطلق ضحكة شريرة على  
طريقة أفلام الكرتون) أووهااهاهاهاها..

إظلام

## محطة انتظار

(دكة خشبية تمثل محطة انتظار في الشارع، حيث  
يجلس برناردو ومارسيل، قرب عربة خشبية  
مركونة جوار بعض المهملات، برناردو يلتهم حبات  
التفاح الفاسد، ومارسيل يطالع الصحف)

مافيش تفاحة سليمة توحد ربنا.. ولاد الهرمة  
مابيحدفوش غير تفاح معفن.. أدي اللي طلعلنا  
بيه..

برناردو :

(يفتش في الصحف) أنا متأكد إن موقف النقاد  
مختلف..

مارسيل :

طبعا.. دول مابيحدفوش حاجة خالص..

برناردو :

(يصرخ) أهوووه (يقرأ في الصحيفة) آدم وحواء  
في القرن الثاني عشر بقلم فيليب أنطون..

مارسيل :

- بناردو : فيليب أنطون حنة واحدة!! سترك يا رب..
- مارسيل : صفحتين بحالهم عننا..
- بناردو : وريني كدا (يتجاذبان الصحيفة)
- مارسيل : بناردو ومارسيل ظاهرة جديدة من ظواهر
- انحدار الفن والقيم والأخلاق...
- بناردو : زوج من المهرجين لم يتوقف طموحهما عند
- تشويه تاريخ المسرح الفرنسي العظيم.. بل
- امتد إلى تشويه قصة الخلق...
- مارسيل : والسخرية من شخصيات ذات قداسة مثل آدم
- وحواء...
- بناردو : بشكل يصل إلى حد التحريف...
- مارسيل : والتجديف.. (صوت جرس كنائسي، بناردو
- ومارسيل يواصلان القراءة)
- بناردو : لقد انحدر فن التمثيل القديم إلى تمثيلات هزلية
- ماجنة يمثلها المغنون الجوالون والمهرجون في
- ساحات القصور وميادين القرى..

مارسيل : ولكن ستظل الكنيسة أشهر منابع التمثيل في عصرنا.. شأنها في هذا شأن اليونان القديمة..

برناردو : فالقداس نفسه منظر تمثيلي..

مارسيل : والحرم المقدس مسرح مقدس..

برناردو : وعلى الكنيسة حماية الفن والمقدسات من أيدي العابثين

مارسيل : أمثال برناردو ومارسيل..

برناردو : ولكن ماذا تفعل الكنيسة في مجتمع ينغمس في الجهل والخرافة والطقوس الوثنية؟

مارسيل : إن الأمر لا يتعلق بتاريخ المسرح الفرنسي فحسب..

إننا أمام فئة منحطة تطمح إلى تشويه تاريخ الحضارة الإنسانية كلها والخروج عن النص المقدس.. أكرر.. نحن أمام فئة منحطة!!

برناردو : كتر خيرك يا عم أنطون..

مارسيل : أكرر.. نحن...

برناردو : (مقاطعا) خلاص..

مارسيل : المقالة دي تفاحة واتحدفت على دماغنا .. احنا

لازم نرد ع الكلام دا ..

برناردو : بالذمة ليك نفس ترد ..

مارسيل : طبعا هارد .. يعني مسيو أنطون دا بقاله 70 سنة

بيكتب في المسرح .. 70 سنة تشويه .. ولسه ما

خدش باله إيه سبب انحدار المسرح .. دالو كان

أوديب كان فتح .. ماشي يا أنطون الكلب .. إن

ما كنت أفكر لك في اسكتش يطلع من نافوخك ..

برناردو : أنا باقول كفاية علينا علقه واحدة ..

مارسيل : احنا قلنا إيه؟ .. النهاردة نتشتم ونتضرب ..

بكرة نتشتم وبس ...

برناردو : (مقاطعا) بعده يتلعن سلسفيل أهالينا .. ما

أنا عارف .. مش هترتاح غير لما يعدمونا

بالخازوق .. (يحزم حقيبته استعدادا للرحيل)

مارسيل : الخازوق لو سبناهم يكوشوا ع المسرح ..

مسرح لقيصر ومسرح للاله .. ونطلع احنا م

المولد بلا مسرح ..

برناردو : أنا باتكلم ع الخازوق الثاني.. المدبب من فوق  
دا.. عارفه؟..

مارسيل : لو فكرنا بالطريقة دي هنفضل محلك سر..

برناردو : انت السبب في كل العك دا.. خرّجتنا م  
الكنيسة.. وقلبت الدنيا على دماغنا بأفكارك..  
ولسه بتقاوح؟..

مارسيل : دلوقتي بقت أفكارى؟.. والمسرح؟.. وأحلامنا؟..  
روما ولندن وبرلين وأبو حمص؟..

برناردو : حتى لو روحنا الجنة.. ببوزك الناشف دا  
هنتطرد منها هي كمان.. واضح إنك من كتر ما  
مثلت حوا بهتت عليك..

مارسيل : يعني خلاص.. مافيش برناردو ومارسيل؟..

برناردو : كان عندك حق لما قلت كل واحد ينام في الشارع  
اللي يريحه.. (ينصرف حاملا حقيبتة)

مارسيل : كويس إنني قلت حاجة صح..

برناردو : (يعود من الخارج بعد لحظات) هنرجع الكنيسة

ونتأسف لهم ونعرض عليهم فكرة السفر..  
ونرجع ناكل ونستحمى وننام زي البني آدمين..  
قلت إيه؟..

مارسيل : (يتجاهل برناردو، يدندن بغتوة وهو يجمع أغراضه  
استعدادا للرحيل)

يا قلب..  
مالك شط..  
مالك مرسى..  
مالك بيت..  
على كل بر انحذفت..

برناردو : وكل باب دقيت..

مارسيل : احتمال أخبط على باب يفتح لي ف يوم م الأيام..  
بس الأكيد إنك هتفضل طول عمرك كدا..

برناردو : (يوصل الغناء)

وأمنت بالفردوس..  
وبضحكة الأراجوز..  
وبزفة الموالييد..

مارسيل :

(يعبر بوابة الكاتدرائية ويختفي) خليك لحد ما

يسحبوا الشارع من تحت رجلك..

(يوصل الغناء في طريقه للخارج)

وحلمت بالأوطان..

والسعد ف الفئان..

والحب ف الحواديث..

أحلام سعيدة..

وبعيدة..

ع النظر والإيد..!

(بمجرد أن ينصرف مارسيل، تبدأ العرببة الخشبية

في التحرك كأن قوة خفية تدفعها، تتحرك العرببة

بتلصص، ثم يبرز من داخلها ذراع ميشيل - فتاة

متسولة ترتدي بعض الهلأهيل - تلتقط بقايا التفاح

الفاقد من على الأرض، لحظات ويظهر برناردو

مقدوها خارج بوابة الكاتدرائية ومن ورائه حقيبته

فتختبئ ميشيل داخل العرببة، يسقط برناردو مغشيا

عليه، يبرز ذراع ميشيل مرة أخرى ليلتقط حقيبة

برناردو، ثم تهم العرببة بالرحيل بهدوء شديد

لكن برناردو يعود إلى وعيه ويلمح العربية تتحرك  
وحدها - بذهول، ينهض ويتسلل على أطراف قدميه  
للامساك بالعربية لكنها تهرب مندفعة، يستمر  
برناردو في مطاردة العربية - في كل الاتجاهات - التي  
تصدمه في النهاية فيسقط مرة أخرى مغشيا عليه.  
تتوقف العربية لحظات، يبرز منها رأس ميشيل،  
تتلفت يمنة ويسرة، ثم تقفز من العربية وتنحني  
على صدر برناردو حتى تتسمع النبض، فيقبض عليها  
برناردو ضاحكا)

برناردو : قفشتك.. الشنطة يا بنت الحرامية.. أنا مش  
سايك غير ف القسم..

ميشيل : (تصاب بالفرع، تنخرط في بكاء طفولي).....

برناردو : والنبي إيه؟.. فوتي قدامي وريني سارقة إيه  
تاني؟.. (يقودها إلى العربية ليستعيد حقيبتها،  
يخرج من داخل العربية بعض حبات التفاح، بينما  
يتصاعد بكاء ميشيل) جاتك خيبة.. دا اللي  
قدرتي عليه.. شوية تفاح معفن؟!

ميشيل : (مستمرة في البكاء) وانتوا كان عندكوا تفاح  
صايح وأنا ماسرقتوش !!؟

برناردو : انتي جعانة !!؟

ميشيل : (بتهم) لا.. من هواة جمع التفاح المعفن !!..

برناردو : ومالقيتيش في باريس كلها حد تسرقه غيري..

ميشيل : بختي الاسود..

برناردو : (يتأكد من محتويات الحقيبة) ع العموم ما

كنتيش هتلاقي فيها حاجة غير هدم التمثيل..

ميشيل : هو البعيد مشخصاتي !!؟..

برناردو : (يقدم نفسه بثقة) برناردو ليكونت..

ميشيل : (تنهال عليه بالضرب) ونازل في أسئلة وشتيمة

وتقطيم م الصبح.. ولا أما تكون مباحث.. كل

دا على تفاحتين حمضانين واللي يدور عليك

يلاقك سارقهم..

برناردو : (يلوي ذراعها) احترمي نفسك.. التفاح دا بتاعي

يا حرامية..

ميشيل :

وانت بقى بسلامتك اللي زرعته ١٩..

برناردو :

لا.. أنا اللي اتحدفت بيه.. كل تفاحة من دول  
سايبه علامة ف جتتي..

ميشيل :

(تحاول الافلات من قبضته بصعوبة) كان واجب  
يحدفوك بالطوب..

برناردو :

وأنا اللي صعبتني عليّ وكنت ناوي أعزمك ع  
العشا.. قدامي ع القسم.. إن ما كنت أخليهم  
يعلقوكي من لسانك الطويل دا؟..

ميشيل :

(تعاود البكاء الطفولي) سيبني أروح الله لا  
يسيتك.. دا أنا باجري على يتامى أدي لهم  
ليلتين ما كالوش..

برناردو :

أيوة يا اختي اعملهم عليّ..

ميشيل :

(مستمرة في البكاء) وأنا لو كنت أعرف أعملهم  
على حد كان دا بقى حالي..

برناردو :

خلاص ما تعيطيش..

ميشيل :

(يعلو بكاءها أكثر)...

خلاص بقى.. (يقدم اليها التفاح) وادي التفاح

برناردو :

أهو يا ستي..

(تواصل البكاء)...

ميشيل  
مارسيل :

(يضع في فمها تفاحة لتكف عن البكاء) خلاص

برناردو :

بقى.. ماتخافيش.. انتي صدقتي اني هاوديكي

القسم بجد.. أنا لو دخلت القسم مش هاخرج..

دول شوية تمثيل بس..

(لا تكف عن البكاء والتهام التفاح في نفس

ميشيل :

الوقت)...

انتى باين عليكى بنت حلال.. انتى اسمك إيه؟..

برناردو :

(تتحدث وفمها مزدحم بالطعام) ميشيل..

ميشيل :

مش باين عليكى يعني..

برناردو :

قصداك إيه يعني؟..

ميشيل :

ميشيل اسم جميل..

برناردو :

كثر خيرك..

ميشيل :

قصدي تحسي إنه اسم بنت من الطبقة الراقية..

برناردو :

ميشيل : كتر ألف خيرك ..

برناردو : يوووه.. قصدي أقول إنه اسم مجلص وتقبل ..

ميشيل ومايكل كلها تنويعات على ميخائيل ..  
يعني ملاك الرب .. معقول ملاك الرب مش لاقى  
في الأرض كلها لقمة يسد بيها جوعه ..

ميشيل : أنا أعرف إن الملائكة مابيجوعوش ..

برناردو : تحبي أوصلك للبيت ..

ميشيل : (تقفز في العربة) متشكرة أنا عارفة سكتي  
كويس ..

برناردو : لو جعتي تاني إسألني عليّ في أي مسرح ..  
برناردو ليكونت .. باي باااي ..

(تنصرف ميشيل بالعربة وهو يلوح لها مودعا، بعد  
أن تختفي، يتراقص برناردو في سعادة)

برناردو : (يغني)

شفت القمر في السما

قلبي اتخطف مني

أبيض ..

تقولشي ملاك

أسمري..

تقول جنني

قمحي..

تقول

شارب من الاتنين

نيالي..

تقول

تايه ما بين شطين

خفري..

تقولشي حزين

تقول مكسوف

تقولشي بيرتعد م الخوف

كأنه بيرتعش م اللملس

كان عيونه بتبربش

ف نور الشمس..

وكانه سايق علي

الحب.. وكانني...

شفت القمر ف السما

قلبي اتسرق مني..

(يلتفت فلا يجد حبيبته معه مرة أخرى)

برناردو :

الشنطة !! يا بنت الشياطين.. تستاهل يا  
برناردو.. بقى حنة بت حافية زي دي عرفت  
تعمل عليك نمرة وانت زي الققص.. طبعاً..  
مسافة ما نزلت لها دمعتين اتهايا لك إن فعلا فيه  
ملايكة ع الأرض.. لهفت التفاح وعدة الشغل  
وقلبك بالمرة.. كان لازم تفهم إنها بتكذب عليك  
يا أهبل.. بتمثل.. بتمثل.. (تبرق عيناه بفكرة)  
تمثل!!!! (يتجمد المشهد)

الراوي :

كانت العروض المسرحية تمثل فقط على أيدي  
رجال.. لهذا فإن الأدوار النسائية كان يقوم  
بها شباب لم يغير البلوغ أصواتهم بعد.. كان  
يتطلب منهم الأمر التمتع بذاكرة جيدة.. صوت  
قوي.. ومهارة في المصارعة والرقص والغناء  
والتمتع بمظهر رقيق.. للاحتفاظ بالأدوار  
النسائية حتى الوصول إلى المراهقة..



## البيت

(المسرح ما زال مظلما، نسمع صوت الراوي)

الراوي :

ومن المعروف عن "الإنديكوثير" أنه من أشهر حيوانات ما قبل التاريخ ورغم أنه يرتبط بحيوان الخرتيت إلا أن ارتفاعه كان يتجاوز سبعة أمتار.. ويصل وزنه إلى خمسة عشر طنا بما يعادل وزن ثمانية خراتيت حديثة.. كان لابد من تمرير هذه المعلومة التي لا علاقة لها بسياق روايتنا.. فقط حتى ينتهي الفنيون من تغيير الديكور.. وشكرا..

(يضاء المسرح على أطلال مكان مهجور، يظهر برناردو متسللا يتخفى في وشاح ويحمل سلة تفاح، ونلاحظ أنه كل خطوتين يلقي بتفاحة على الأرض، لحظات

وتظهر العربية التي تتبع برناردو بهدوء، ويبرز منها  
ذراع ميشيل الذي يلتقط التفاح من على الأرض،  
ويبدو أن برناردو يستدرج ميشيل إلى منزله الذي  
هو عبارة عن جحر صغير بين هذه الأطلال المهجورة  
يسكنه برناردو بشكل غير شرعي، بمجرد أن تقترب  
العربية من المنزل حتى ينقض برناردو على ذراعي  
العربية ليوقفها، تخرج ميشيل رأسها من العربية،  
تصرخ، برناردو يدير العربية في كل الاتجاهات  
ضاحكا، تقفز ميشيل خارج العربية وتركض، نلاحظ  
أنها ترتدي ثياب آدم)

برناردو : استني عندك.. (يقبض عليها) يا بنت الجنية..  
لحقني قيفتي الطاقم؟..

ميشيل : انت عاوز مني إيه يا راجل انت؟!..

برناردو : إقلعي بالذوق أحسن لك..

ميشيل : (تصفعه بقوة وتنصرف) ...

برناردو : (يستوقفها) لأ.. مش قصدي كدا.. أصل دي  
هدوم المسرح.. أول درس لازم تتعلميه إن

هدوم الممثل جزء من شخصية الممثل..

(بعد تفكير) أيوه.. يعني عايز إيه؟!!

ميشيل :

يعني من النهاردة مافيش سرقة ولا شحاتة ولا  
شغل التلات ورقات بتاعك دا.. هتشتغلي معايا  
وهتسمعي الكلام وهاجيب لك هدوم أجمل من  
اللي لطشتيها..

برناردو :

أشتغل إيه؟.. أتحدف بالتفاح!!

ميشيل :

مش أحسن ما تسرقيه؟!!

برناردو :

من ساعة ما شفتك وأنا قلت الجدع دا باين  
عليه مهفوف.. يا راجل اختشي على دمك.. بقي  
عمرك شفت واحدة تشتغل مشخصاتية زي  
الرجالة؟!!

ميشيل :

لأ طبعا.. عشان كدا هتدخلي التاريخ من أوسع  
أبوابه..

برناردو :

طب انت ترضاها لأمك!!

ميشيل :

باقول لك هتدخلي التاريخ يا جزمة..

برناردو :

- ميشيل : يفتح الله ..
- برناردو : يبقى تقلعي الهدوم في القسم ..
- ميشيل : استغفر الله العظيم يا رب .. انت طلعت لي منين ؟ ..
- برناردو : انا محتاج لك يا ميشو .. الفرصة بتيجي مرة واحدة ف العمر .. لو حظيتي إيدك في أيدي هنعمل ثورة مسرحية في فرنسا .. في العالم كله ..
- ميشيل : وهنديني كام ؟ ..
- برناردو : عشر تفاحات ف اليوم .. ( يناولها سلة التفاح ) ودا أول مرتب ..
- ميشيل : أمري لله ( تهم بخلع ثيابها تكن برناردو يمنعها )
- برناردو : انتي بتعملي إيه ؟ ..
- ميشيل : انت مش قلت " محتاج لك يا ميشو " ؟ ..
- برناردو : هي دي بس اللي فهمتيها ؟ !! بعدين هو أي حد يقول لك " محتاج لك يا ميشو " تعملي كذا ؟ !!

ما انت لو تجيب م الآخر..

ميشيل :

(يعطيها بعض الأوراق) دا نص المسرحية..

برناردو :

تحفظي دور حوا زي اسمك.. وبعد ما تحفظي  
نبدأ البروفات..

(لنفسها) أنا قلت باين عليه مهفوف (لبرناردو)

ميشيل :

وأنا لو باعرف أفك الخط يا بجم كنت اتنيلت  
قابلتك!؟

واضح إننا هنتعب مع بعض..

برناردو :

(برناردو يبدأ في كتابة حروف الهجاء على الجدران)

أمام ميشيل، تتصاعد موسيقى L'Alphabet de

Mozart ، يظلم المسرح تدريجيا ويعود صوت الراوي)

ومضت شهور طويلة.. وقعت خلالها أحداث

الراوي :

مثيرة بين برناردو وميشيل كنت أتمنى أن أرويهما

لكم لو أسعفني الوقت.. ولكن يؤسفني أننا لن

نحتاج هذه المرة لتغيير الديكور.. فإلى اللقاء..

(يضاء المسرح على نفس المكان بعد مرور شهور،

برناردو وميشيل في ثياب آدم وحوا)

برناردو : انظري ما صنعت يد الرب الإله.. مثل هذا الجمال  
لا تصدقه عين.. نهار وليل.. ماء ويابس..  
غابات من الأشجار الظليلة تسبح في وداعة..  
فضاء مرصع بالنجوم الوضيئة.. وشمس لا  
تتخلف عن زيارتنا يوما.. لا أكاد أصدق أن هذه  
الجنة ستكون عشنا للأبد..

.....  
ميشيل : لا أكاد أصدق أن هذه الجنة ستكون عشنا  
الأمن للأبد..

.....  
برناردو : أنا باقول لا أكاد أصدق أن أم هذه الجنة ستكون  
عشنا  
الأمن للأبد..

ميشيل : (تخرج ورقة تقرأ منها) أه.. حقا يا أخويا.. هذا  
المكان هو النعيم الأبدي الذي كتبه لنا الرب  
الإله.. تقترب حواء من آدم حتى...

برناردو : انتي بتقري اللي بين الأقواس؟!... انتي

هتجنفني؟ .. مالك؟ .. مالك؟ .. ما كنتي بتمثلي  
ف الشارع زي القردة .. ف ثواني خلتييني  
أصدق إن فيه ملايكة ع الأرض .. ويقالك خمس  
شهور مش قادرة تخلييني أصدق إنك حوا ..

ميشيل :

بلاش منها يا عم الشغلانة بتاعتك دي .. أنا ما  
صدقته لجمع كلمتين على بعض .. لسه هانقي  
اللي جوا الأقواس م اللي برا الأقواس ..

برناردو :

لو عايزة تمثلي يبقى لازم تسمعي الكلام ..

ميشيل :

و أنا كنت قلت لك إنني عايزة أمثل ..

برناردو :

أحنا لسه فيها .. قدامي ع القسم ..

ميشيل :

خلاص .. خلاص .. (تعاود القراءة) أعدك أنها  
لن تتكرر ..

برناردو :

ولو تكررت؟ ..

ميشيل :

ماذا؟ ..

برناردو :

يوووووه ... ها أنا أتورط في الخطيئة مرة  
أخرى .. عفوا أيها الرب الإله .. ولتحل بي

اللعنات لو فعلتها مجددا.. (ترتفع من مكان بعيد  
صيحة طائر)

ميشيل : آدم.. أسمع صيحة الشحرور؟..

برناردو : (في سعادة) آآآآه.. ما أعذب هذا الصوت..

(يستدرك) ولكنها صيحة العنديل..

ميشيل : بل هو الشحرور.. فإن أذني لا تخطئه..

برناردو : حوا.. إنه العنديل..

ميشيل : شحرور..

برناردو : عنديل..

ميشيل : شحرور..

برناردو : عنديل..

ميشيل : شحرور..

برناردو : عنديل..

ميشيل : شحرور...

برناردو : (مقاطعا) خلااااا..

أصلي باحب الحثة دي قوي..

ميشيل :

هنهزر؟!..

برناردو :

طب مرة كمان والنبي..

ميشيل :

خشي ع اللي بعده.. القمر يكتمل..

برناردو :

القمر يكتمل..

ميشيل :

يالروعة.. إن قلبي أضعف من أن يحتمل مثل

برناردو :

هذا البهاء.. يريد أن يقفز من بين أضلاعي

ليعانق السحاب..

ذات مساء سنجلس فوق تلك الرُبى لنحصى

ميشيل :

ما مر من عمر جميل.. وبعد أن تحمل كل هذي

الأشجار تذكاراتنا.. حتى لم يعد عليها متسع

لنقش تذكارات جديدة و"كدهوه!!" .. يومها من

الممكن أن نفكر في الرحيل من هذا المكان.. وفي

نقش تذكارات جديدة على وجه القمر..

(في هذه اللحظة يقترب الاثنان من بعضهما بأداء

رومانتيكي، وفي نفس اللحظة يظهر مارسيل واقفا بينهما

حاملا حقيبتته، ويبدو أنه يراقب المشهد منذ لحظات)

مارسيل : (برناردو، بعد نظرة فاحصة لميشيل كأنه يتأكد من أنوثتها) مين دي؟! ..

برناردو : (يعانق مارسيل) مارسيل؟! ..

مارسيل : (يصده) أيوه زفت.. (لميشيل) اسكوز موا..  
(يجذب برناردو من ذراعه لينتحي به جانبا)

ميشيل : اسكوزك معاك يا باشا !!

مارسيل : (برناردو) إيه اللي بيحصل؟! ..

برناردو : انت إيه اللي جابك دلوقتي؟! .. أنا كنت ناوي أقول لك على كل حاجة ف وقتها ..

مارسيل : (بحماسة) فكرت ف كلامك ولقيت إن مش كله

غلط.. صعب نكسر قوانين عمرها آلاف السنين

ف يوم وليلة.. دا يبقى اسمه انتحار مش ثورة..

ولقيت إن التغيير الحقيقي لازم يكون تاتا تاتا..

ع الأقل عشان الناس تستوعبه.. حتى البابا..

حتى الملك لويس بجلالة قدره مضطر يقدم

تنازلات من وقت للتاني عشا... (يتذكر فجأة)

مين دي؟! ..

ميشيل :

(تذهب إليهما وتجذب برناردو من ذراعه لتتحي  
به جانبا، مارسيل) اسكوز موا.. (تلاحظ أن  
مارسيل يتنصت على الحوار، لبرناردو) شوف يا ابن  
الناس.. أنا سبت كاري ورضيت أشتغل معاك  
في المسخرة دي على نن عيني.. علمتني القراءة  
والكتابة على آخر الزمن بعد ما كنت زي الموزة  
المغمضة ومافتحتش بُقي.. هلكت اللي جابوني  
معاك خمس شهور بروفات بروفات  
وأنا كاتمة ف قلبي.. لكن توصل لأنك تجيب  
صُحَابَاتك الصيغ تفرجهم عليّ وشرف أُمي...  
(يضع يده على فمها في حرج) بس يا واطية.. بس..  
دا ممثل زميل..

برناردو :

ميشيل :

وانتوا بقي كام زميل في أم المسرحية دي إن  
شاء الله!

برناردو :

مافيش حد.. مسيو مارسيل هو اللي كان بيمثل  
دور حوا قبل منك..

ميشيل :

لا يا حبيبي.. أنا ما أدخلش على ضرة أبدا !!

- مارسيل : (مصعوقا ينادي على برناردو) برناردو وووو ..
- برناردو : (ميشيل) يخرّب بيت أهلك ..
- مارسيل : (يجذب برناردو لينتحي به جانبا، ميشيل تتنصت على الحوار) الكلام اللي سمعته دا حقيقي؟!
- برناردو : انت سمعت لغاية فين؟!
- مارسيل : ما تستعبطش .. أنا عايز أعرف الكائن دا بيعمل إيه هنا بالضبط!!؟
- برناردو : ما هي دي المفاجأة اللي كنت محضرها لك .. ميشيل .. اكتشافي ..
- مارسيل : (بانفعال) قول بقى إنك كنت بتتلكك بحكاية المقال عشان تقلشني ..
- برناردو : ورحمة أمي ما حصل .. ميشيل ما ظهرتش في حياتي غير بعد ما سبنا بعض ..
- مارسيل : انت اللي سبتني في الشارع زي الكلب ورجعت الكنيسة ..
- برناردو : لو كنت استنيت ثلاث دقايق بس كنت عرفت

إنهم طردوني .. كان صعب يقبلوني في الكنيسة

بعد اللي عملناه يا مارسيل .. (ميشيل تشهق)

أنا ماضربتكش على إيدك .. (ميشيل تخبط على

مارسيل :

صدرها مصعوقة) طالما وافقت م الأول يبقى كان

لازم نقف في وش الكنيسة للأخر .. لكن انت

طلعت خاين .. كل اللي كنت بتفكر فيه إزاي

تخلص مني .. وعشان مين ؟ .. عشان دي !!؟

(تنظر لبرناردو، تضع يدها في وسطها وتتمايل في

ميشيل :

نوم) زميل .. ها !!؟

(لمارسيل) حاول تفهمني يا مارسيل .. البت دي

برناردو :

لو نجحت هتبقى ضربة معلم .. دي مش بس

ثورة مسرحية .. دي ثورة إنسانية .. تخيل كام

بنت هتفكر تمثل بعد كدا .. النسوان لو بقى لهم

مكان في المسرح النهاردة .. بكرة هيبقى لهم

مكان في البرلمان .. صدقني ..

(يشير لميشيل بازدراء) دي !!؟

مارسيل :

أيوة دي .. (يقترّب من مارسيل ويهمس في أذنه)

برناردو :

تفتكر مين كانت هتوافق تمثل غير دي؟!

بردون.. مش على حسابي !!

وفين أفكارك التقدمية؟.. فين ضميرك الثوري؟..

فين....

مارسيل :

برناردو :

(مقاطعا) اوعى تكون فاكرا إنها أول بنت تقف ع

المسرح.. أكثر من بنت حاولوا والنتيجة دايما كانت

بتبقى زفت.. كانوا بينضربوا بالجزم.. بيطردوا م

البيوت والكنائس.. بيتزفوا في الشوارع والعيال

ترقلهم بالطوب.. بيتعاملوا معاملة العاهرات..

كل محاولات المرأة في المسرح انتهت في مزبلة

التاريخ.. (أثناء ذلك يبدو الخوف تدريجيا على

ميشيل وتحاول الهرب للخارج، لكن برناردو يلحقها)

(ميشيل) اقفي عندك.. (ميشيل تتجمد مكانها،

لمارسيل) ما انت قلتها بعضمة لسانك.. التاريخ

ممکن يتغير تاتا تاتا..

كان ممكن أصدقك.. بس اللي يكذب مرة..

يكذب ألف مرة..

برناردو :

مارسيل :

- برناردو : يعني إيه؟ هتسيبني تاني؟!
- مارسيل : وأنا كنت سبتك أولاني؟.. (يفترش الأرض ويخرج زجاجته يشرب منها) بعدين مين اللي قال لك إني ماشي.. أنا قاعد على قلبكم..
- برناردو : أهو كدا.. (ميشيل) ميشو.. يللا استعدي عشان توري مسيو مارسيل....
- ميشيل : (مقاطعة) أمري لله (تهم بخلع ثيابها) ...
- برناردو : (صارخا) بتنيلي إيه؟؟!! المشهد.. المشهد.. هتوريه المشهد اللي اتدربنا عليه..
- ميشيل : احنا اتدربنا على مشهد؟..
- برناردو : (بنفاد صبر) يهيه..
- ميشيل : أيوه.. أيوه.. المسرحية.. افكرت.. خلاص ماتبقاش حمقي..
- (ميشيل تبدأ في التمثيل أمام مارسيل بشكل مفتعل جدا، فيدير مارسيل وجهه عنها باستياء وتعال، لكن برناردو يشير لها أن تتحرك في مجال رؤية مارسيل، الذي يشيح عنها بوجهه مرة أخرى، فتظل تطارده

من كل الاتجاهات مع كل عبارة بناء على توجيهات  
برناردو)

(بادء خطابي) أيا أيتها الرياح احملي صوتي  
عبر السموات.. أيا أيتها الجبال فلتتردي  
صلواتي.. أيا أيتها الأمطار "رُخِّي.. رُخِّي.."  
(ميشيل) وراه.. وراه..

ميشيل :

برناردو :

ميشيل :

ولتخلق روعي مثل زهرة صغيرة تتراقص  
مع النسيم (تحرك وسطها بطريقة مبتذلة، ثم  
تهجم تدريجيا على مارسيل مع الكلمات التالية كأنها  
ستفتصبه، وهو يبتعد في دهشة وخوف) لقد عرفت  
الحب.. عرفت الحب.. عرفت الحب..

(برناردو) دي هيلة !!

مارسيل :

(برناردو) خلي صاحبك يحترم نفسه بدل ما  
أهزأه..

ميشيل :

ميشيل.. إيه اللي بتقوليه دا؟! انتي اتجننتي؟!

برناردو :

باقول لك خلي صاحبك يحترم نفسه بدل ما  
أهزأك وأهزأه..

ميشيل :

مارسيل : تهزأي مين يا (يتجمد المشهد، يعود صوت الراوي)  
الراوي : نعتذر عن تقديم هذا المشهد لأن به ألفاظاً نابية..  
(نسمع صوت صفير طويل بينما يتشاجر مارسيل  
مع ميشيل بالأيدي وبرناردو يحاول فض النزاع  
بصعوبة، نتبين بعض الكلمات غير الواضحة من  
الشجار عندما يتوقف الصفير للحظة من وقت لآخر  
كالتالي : ... )

ميشيل : لمي ماعرفتش تربيك يا معاً ...  
مارسيل : هو المسرح هيلملم يا بنت الـ  
برناردو : خلاص عيب بقى خلاص ماتبقوش  
مارسيل : للمي طرّقك على أم الـ  
ميشيل : ما انت لو كنت راجل وف طيد  
برناردو : كدا الملابس هتتقطع وهاطلع مايد  
مارسيل : مش عليكى العيب ع الـ

(يظلم المسرح على الشجار، يستمر الصفير مع صوت

الراوي)

واستمر الصراع يوما بعد يوم.. وقعت خلالها مواقف طريفة ومشاحنات كوميدية وفكاهات رائعة.. فضلنا أن نحذفها تماما من السياق رفقا بأذان المستمعين من الصغير.. (يتوقف الصغير) وذلك دون أدنى تأثير على البناء الدرامي طبعاً.. مع تحيات جهاز الرقابة العامة على خلق الله !! (موسيقى مناسبة، نفس المكان، بؤرة ضوء على يسار المسرح، حيث يحاول مارسيل النوم بصعوبة فينهض، يروح ويجيء في توتر، يبدو عليه الغيظ، إظلام... بؤرة على يمين المسرح حيث يواصل برناردو تدريب ميشيل وهي تتألم ويبدو عليها التعب لكن برناردو يضربها بخيزرانة لتواصل التدريب، إظلام... تضاء البؤرة الأولى على مارسيل وقد علق أمامه رسماً كاريكاتيرياً لميشيل يتعلم عليه الرماية بالسكاكين، إظلام... تضاء البؤرة الثانية على برناردو وميشيل يستسلمان للنوم في وداعة، لحظات وتنهض ميشيل تتأكد أن برناردو نائماً، تجمع كل ما تظوله يداها وتضعه في العربة الخشبية وتحاول الهرب، لكنها في

اللحظة الأخيرة تسمع صوت مارسيل)

مارسيل : اقفي عندك .. (يظهر قادمًا من الظلام يسار المسرح،  
تتجمد ميشيل في مكانها) بتتسحبي على فين؟ ..

ميشيل : في ستين داهية .. إياكشي تبرد ..

مارسيل : هي إيه دي اللي تبرد !!!

ميشيل : نارك ..

مارسيل : رجعي الحاجة مكانها وخُشي اتخمني ..

برناردو : انت حاطط نترك من نثري ليه يا جدع انت؟ ..

قاعدة مش نافع .. ماشية مش عاجب .. حرامية

نص لبّة .. مشخصاتية كُسر .. كُلّي على بعضي

زفت .. أنا خلاص .. تعبت .. طهقت .. أنا ما

بقتشي عارفة أتلّم على نفسي .. أنا نفسي ما

بقتش عارفة نفسي .. لا قدرة أرجع زي ما كنت

ولا عارفة أبقى زي ما انتوا عايزين .. ولا فاهمة

أي حد .....

مارسيل : (مقاطعا) برناردو بيحبك يا هبلّة ..

ميشيل :

مارسيل :

.....  
الحكاية مش حكاية تمثيل .. ما فكرتيش إيه اللي  
يخليه يضيع خمس شهور من عمره معاكي ..  
إيشمعنى انتي بالذات ؟ .. خلاص ؟ .. النسوان  
انقرضت من باريس ؟ ..

مش يمكن عشان موهبتي ؟ !

ميشيل :

مارسيل :

(بغيطد) هاخبطك على بوزك .. برناردو طول  
عمره مقضيها م الشارع للمسرح للبار .. كل  
ليلة في حزن واحدة .. مطرح ما ترسى بيدق  
لها .. من ساعة ما شاف خلقتك وحاله اتشقلب ..  
بقى عنده هدف بجد .. هدف حقيقي قادر يشوفه  
ويلمسه .. مش مسرحية جديدة ولا رحلة  
لآخر العالم ولا قرشين زيادة هيبعترهم على  
اصحابه .. (ضاحكا) برناردو .. برناردو اللي علم  
على نص نسوان البلد دلوقتي بقى بيدافع عن  
حقوق المرأة وبيطالب بالمساواة وحالف يغير  
حركة التاريخ من أجل بناء مجتمع قائم على

الليبرالية وحرية التعبير والرأي والنوع وال  
(يتوقف عن الكلام للحظات وينظر ميشيل) انتي  
فاهمة حاجة؟..

ميشيل : أنا اللي أفهمه حاجة واحدة بس.. لو كنت  
باعرف أمثل كنت اتنيلت مثلت.. أكيد اللي  
ماعرفتش اتعلمه في خمس شهور مش هاتعلمه  
ولا ف 100 سنة..

مارسيل : عمرك ما هتمثلي طول ما بتتعلمي غلط..

ميشيل : لا هو أنا كل دا كنت باتعلم غلط؟..

مارسيل : للأسف..

ميشيل : يعني صاحبك طلع بلح؟..

مارسيل : لو فعلا عندك استعداد تمثلي مش عشان

برناردو ومش عشان حد.. ممكن أعصر على  
نفسي لمونة وأعلمك..

ميشيل : وهتفرق في إيه؟!

مارسيل : تفرق إن برناردو راجل !

تصدق بالله.. أنا من يوم ما شفتك وأنا مش  
متطمنا لك..

ميشيل :

احترمي نفسك.. الأدوار النسائية أصعب  
بكثير من غيرها.. إنك تكوني بنت في البطاقة  
حاجة.. وإنك تبقى بنت على المسرح حاجة ثانية  
خالص.. كتافك لتحت.. دقنك لفوق.. ضهرك  
مشدود زي السهم.. خطواتك على المسرح لازم  
تكون خفيفة كأنك ماشية ع السحاب.. تخيلي  
إن فيه جواكي آدم وحواء.. وحاولي تحدي  
المسافة بين الاثنين.. محتاجة تخسي كثير..

مارسيل :

اتقي الله.. دا أنا عايشة على عشر تفاحات في  
اليوم..

ميشيل :

من بكرة هيبقوا ثلاثة..

مارسيل :

(تصرخ) نعم؟..

ميشيل :

اسمها حاضر.. وتراعي وانت بتقول لها المسافة  
بينك وبين وذن اللي قدامك.. إنه يا دوب يسمعها  
وإنه لازم يسمعها.. تعرفي ترقصي؟..

مارسيل :

(تحرك وسطها بنفس الطريقة المبتذلة) فشر.. ما

ميشيل :

انت شفتني بنفسك..

دي اعراض اسهال.. الرقص هيساعدك

مارسيل :

كثير ع الحركة.. الأول تحفظي الخطوة زي

اسمك.. بعد كدا تتعلمي إزاي الراجل ممكن

يؤدي الخطوة.. وإزاي الست ممكن تؤدي

نفس الخطوة.. افتكري دايمًا إن المسرح حاجة

والحقيقة حاجة تانية.. في الحقيقة ممكن

قوي حوا تكون مكورة ومبجرة زي الكورة

الشراب.. لكن المسرح فيه جمهور جاي يشوف

حوا زي ما رسمها في خياله..

طب والكورة الشراب تعمل إيه في نفسها؟!

ميشيل :

تطق!!

(ضاحكا) حتى الكورة الشراب ممكن تتحرك

مارسيل :

بأنوثة.. بشوية تمثيل..

قطيعة يا شيخ تقطع التمثيل ع اليوم الاسود

ميشيل :

اللي شفتكوا فيه..

عشان تعرفني يعني إيه تمثيل لازم تعرفني يعني  
إيه مسرح.. وعشان تعرفني يعني إيه مسرح  
لازم تعرفني يعني إيه عالم.. العالم يا ميشيل  
دايرة صراعات.. سوق أفكار على شكل مربع  
ناقص ضلع.. دول بيتاجروا بالسما.. ودول  
بيتاجروا بالأرض.. ودول بيتاجروا بلحمهم..  
وكل واحد بيحارب التانيين علشان بضاعته هي  
اللي تباع.. وهنا الضلع الناقص.. الجمهور..  
أو تقدرني تقولي كدا الزبون اللي هيخرج من  
السوق بشوية أفكار.. والتاجر الشاطر هو اللي  
يقدر في النهاية يسوق أفكاره..

مارسيل :

بقي هو دا المسرح؟..

ميشيل :

لأ طبعا.. بس لو فكرتي فيها شوية هتلاقي إن  
كل الأطراف اتفقوا على شروط اللعبة..

مارسيل :

لعبة إيه؟..

ميشيل :

التمثيل.. لو افترضنا إن المسرحية بتتكون  
من مجموعة أفعال درامية.. يبقى الممثل هو

مارسيل :

الشخص اللي بيؤدي الفعل.. الحب فعل..  
والقتل فعل.. والرقص فعل.. حتى الفُرجة ع  
المسرح فعل..

(تنظر للجمهور) قصدك إن دول كمان بيمثلوا..

ميشيل :

(يشير للاتجاهات الأربعة) قصدي إن كووووول

مارسيل :

دول بيمثلوا.. بيمثلوا إنهم بيحاربوا بعض  
والحقيقة إنهم بيكملوا بعض.. بيخدموا على  
بعض.. لأن طول ما دول بيتاجروا في السما..  
دول هيفضلوا يتاجروا في الأرض.. وبكدا  
الناس هتفضل تتاجر في لحمها.. والجمهور  
هيفضل يتفرج.. ويبقى الحال على ما هو  
عليه!..

(تلتطم خدها في ذهول) وهو دا المسرح!!!

ميشيل :

لأ برضو.. لأن كدا المربع مقفول من كل ناحية..  
والمسرح طول عمره مربع ناقص ضلع.. ناقص  
متفرج.. متفرج حقيقي مش كومبارس بيلعب  
دور المتفرج.. عشان كدا التاريخ محتاج من

مارسيل :

وقت اللقائي لحد يكسر المربع .. يغير شروط  
اللعبة .. يكشف الورق .. وهو ذا المسرح ..  
(تفرك عينها) ما تيجي ننام ..  
ماقيش نوم قبل ما تمثلي المشهد كويس ..  
حرام عليك .. دي فيها خمس شهور تاني ..  
حوا موجودة جواكي بالفعل .. مش محتاجة  
تدوري عليها .. المفروض إن المشهد بيعبر عن  
إحساس حوا بعد الخروج م الجنة .. (يربط  
على عينها عصابة ويتركها تتحسس الفراغ من  
حولها) يمكن في اللحظة دي حسست إن العالم  
كبير عليها .. أكبر من إنها تحدد بدايته من  
نهايته .. كانت خيفة .. مع ذلك فيه صوت جواها  
بيقول إنها كان لازم تخرج م الجنة .. كان لازم  
تنزل الأرض وتشوف العالم على حقيقته ..  
كانت حزينة لأنها اكتشفت قد إيه العالم كبير  
وهي صغيرة .. وفي نفس الوقت سعيدة لأنها  
عرفت حجمها الحقيقي .. إحساس مركب ..

ميشيل

مارسيل

ميشيل

مارسيل

نفسها تضحك وتعيط وتصرخ وتغني في نفس  
الوقت..

أيا أيتها الرياح...

ميشيل :

(مقاطعا) كدابة.. دا صوت واحدة بتشحت مش  
بتغني..

مارسيل :

أيا أيتها الرياح...

ميشيل :

(مقاطعا) وحش..

مارسيل :

أيا أي.....

ميشيل :

(مقاطعا) ما تزعقش.. الرياح دي مش شغالة  
عند اللي خلفوكي..

مارسيل :

أيا أيتها الرياح.. احملي صوتي عب....

برناردو :

(مقاطعا) حوا مش محتاجة تمثل الخوف.. هي  
خايفة فعلا.. محتاجة حد يسمعها..

مارسيل :

أيا أيتها الرياح.. احملي صوتي عبر السموات..

ميشيل :

(مقاطعا) كأنها بتحاول تتعرف على جيرانها في  
الأرض الجديدة..

مارسيل :

- ميشيل : أيا أيتها الجبال ..
- مارسيل : (مقاطعا) ثاني ..
- ميشيل : أيا ...
- مارسيل : (مقاطعا) ثاني ..
- ميشيل : أنا لسه فتحت بقي ؟ ..
- مارسيل : من غير مناقشة .. ثاني ..
- ميشيل : أيا أيت ...
- مارسيل : (مقاطعا) ثاني ..
- ميشيل : أيا أيتها الج ...
- مارسيل : (مقاطعا) ثاني ..
- ميشيل : أيا أيتها الجبال فلترد ....
- مارسيل : (مقاطعا) ثاني .. ثاني ..
- ميشيل : طب أفهم فيه إيه ؟ ..
- مارسيل : لازم أحس من أدائك إن الرياح معنى والجبال معنى ثاني

- ميشيل : .. دي مش نشرة الأخبار .. تاني ..
- مارسيل : أيا أيتها الجبال ...
- ميشيل : (مقاطعا) م الأول ..
- مارسيل : أيتها الرياح فلتحملي صوتي عبر السماء ..
- مارسيل : (تستدرك) عبر السموات ..
- ميشيل : هنسيب الإحساس بقي وندور ع الكلمة اللي وقعت منك
- مارسيل : .. ما تمثيليش .. كملي ..
- ميشيل : أيتها الجبال فلترددني صلواتي ..
- مارسيل : ها ..
- ميشيل : أيتها الأمطار "هطلي" على ...
- مارسيل : (مقاطعا) كدا انتي اللي بتَهْطلي .. اسمها (اهْطلي)
- ميشيل : "اهْطلي" .. ما سمعتيش عن هطول المطر ..
- مين الحمار
- مارسيل : اللي علمك تقري؟! ..
- ميشيل : برناردو ..

احترمي نفسك.. ثاني م الأول..  
ايا أيتها الرياح احملي صوتي عبر السموات..  
صوتك أعلى..

أيتها الرياح..  
(في هذه اللحظة يصحو برناردو على الصوت المرتفع،  
يفتح عينيه ويتابع أداء ميشيل مدهوشا كأنه يحلم،  
يفرك عينيه، يقترب منها غير مصدق وهي تواصل  
التمثيل بشكل أفضل)

احملي صوتي عبر السموات.. أيتها الجبال  
فلترددي صلواتي.. أيتها الأمطار اهطلي على  
العالم.. ولتحلق روعي كزهرة تتراقص مع النسيم..  
لقد عرفت الحب.. عرفت الحب.. عرفت الحب..

ميشيل :

(يهمس لمارسيل بذهول) مين دي؟؟؟؟

برناردو :

(لبرناردو) محتاجة تقرب شهر كمان ع الأقل..

مارسيل :

(لمارسيل) انت عملت إيه؟؟..

برناردو :

(بفرغ محتويات العربة من المسروقات على الأرض)

مارسيل :

ممثلة..

- برناردو ، ( يقترّب من ميشيل بلهفة ) حوا ..
- ميشيل ، ( تقترّب منه ) آدم ..
- مارسيل ، ( يحيل بينهما ) لسه .. محتاجة شوية دروس في الأدب
- ميشيل ، والموسيقى والتاريخ والفلسفة ..
- مارسيل ، أحيه .. احنا ما اتفقناش على كدا ..
- مش انتي بس يا ميشيل .. باريس كلها .. العالم كله محتاج شوية دروس ..
- ( يبدأ استعراض يؤديه الثلاثة )
- ميشيل ، في أول الدروس
- قلّ أرنبٌ يبوس
- قد يدعى أرنبوس
- الجميع ، هذا إذا وُجد
- ميشيل ، ويدعى للجلوس
- الجميع ، على ما اعتقد
- ميشيل ، في قاعة الشموس

أما ثاني الدروس

برناردو :

فأرنبُ يبيع

قد يُدعى أرنبيع

هذا إذا وجد

الجميع :

ويأكل الربيع

برناردو :

على ما أعتقد

الجميع :

ويصرف الفلوس

برناردو :

.....

وثالث الدروس

مارسيل :

قل أرنبُ نبيل

قد يُدعى أرنبيل

أو يُدعى أرنباش

هذا إذا وجد

الجميع :

وينطح الكباش

مارسيل :

على ما أعتقد

الجميع :

ويركب التيوس

مارسيل :

ورابع الدروس

قل أرنبُ نبيه

قد يُدعى أرنبه

هذا إذا وجد

ويُعطي طالبه

على ما اعتقد

مثل هذي الدروس

... (يستمر الثلاثة في أداء بعض التدريبات

الحركية، يعود صوت الراوي)

ويبدو أن العالم لم يكن على استعداد لمثل

هذي الدروس.. فقد تطلب الأمر آلاف المحاولات

لتخليص المسرح من براثن الدولة والدين والنخبة

وعلاقات الإنتاج وعصابات الرقيق الأبيض

على مر العصور.. وحتى يومنا هذا السادس

والعشرين من سبتمبر عام ألفين وعشرة..

(يُفضل استبدال هذا التاريخ بالتاريخ الفعلي لليلة

العرض) مع الاعتذار الواجب لمحبي الإيهام..

(يظلم المسرح تدريجياً بشكل يعبر عن مرور زمني)

## العرض

(بؤرة ضوء على برناردو وميشيل في هيئة آدم وحواء في منتصف مقدمة المسرح، يؤديان أغنية، وتخيم على المشهد أجواء أوبرالية)

برناردو : " قلتُ فليكن الحبُّ في الأرض..

لكنه لم يكن !

ميشيل

برناردو : قلتُ فليذبِ النهرُ في البحرِ..

والبحرُ في السحبِ..

ميشيل : والسحبُ في الجذبِ..

برناردو : والجذبُ في الخصبِ..

الاثنان : ينبت خبزا

ليسند قلب الجياع..

ميشيل :

وعشبا لماشية الأرض..  
ظلا لمن يتغرب في صحراء الشجن..

برناردو :

قلت فليكن الحب في الأرض..  
لكنه لم يكن !"

الراوي :

(تعالى صيحات اعتراضية من بين الجمهور، وتنهال  
قذائف التفاح الفاسد والأحذية القديمة وصفحات  
الجراند على برناردو وميشيل وهما يحاولان الهرب)  
"ورأى الرب ذلك غير حسن!!" .. وكذلك  
رأت الكنيسة والشرطة والنقاد أن تلك  
المهازل لا تخلو من أفكار تحريضية فاضحة..  
(يستدرك) عفوا.. واضحة.. أما ميشيل فقد  
كان أمامها مستقبل مسرحي واعد بمزيد من  
التفاح الفاسد.. تلقت العديد من هجمات النقاد  
ولعنات الكنيسة والأهم من ذلك عروض العمل  
في مجالات أخرى.. يصعب ذكرها حفاظا على  
الأداب العامة..

إظلام

## محطة انتظار

(برناردو، ميشيل، ومارسيل يجلسون على دكة الانتظار تبدو عليهم آثار

الضرب، يطالعون الصحف)

(تعثر على شيء في الصحيفة) أهوه.. أوقفوا

ميشيل :

المهزلة بقلم فيليب أنطون..

(في نفس الوقت) ثاني؟..

برناردو :

أنا مش فاهم الجدع دا ليه حاططنا في دماغه؟..

ومارسيل :

هو مافيش غيرنا؟..

استنتي بس أما نشوف كاتب إيه المرة دي؟!..

برناردو :

(تقرأ في سعادة بالغة) يجب أن نعترف أن

مارسيل :

المرأة أهم أركان المجتمع الإنساني.. إنها عماد

الأسرة.. ضمير الوطن.. قلب الأمة النابض  
بالحب والعطاء.. يجب ألا

ننكر إسهامات المرأة في عملية التطور والنماء..

میشیل ۱

أنا مش مصدق وداني !

مارسیل :

## أمال فين الشتيمة؟؟!

برناردو :

(تقرأ) وعليه.. فإن ظهور المرأة على خشبة المسرح لكارثة تهدد الأمة.. وتزعزع استقرار البلاد.. إن تاريخ المسرح لا ينفصل عن تاريخ الأمة.. وهنا يتخذ التاريخ مسارا آخر.. لذا أتوجه إلى كل محبي الفنون الجميلة.. الجميلة فقط.. الجميلة قوي.. شديدة الجمال.. أوقفوا المهزلة.. أوقفوا الساقطة ميشيل !!

(لحظات صمت، برناردو ومارسيل يتبادلان النظرات

في ضيق، فجأة تقطع ميشيل الصمت بصيحة انتصار)

(بِسْعَادَةٍ غَامِرَةٍ) مِشِييِيِيِيِيِيِيل.. مِشِيل..

## میشیل :

ميشيل.. اسمى طلع فى الجورنال..

(ياخذ الصحيفة وينظر فيها) مش كاتب حاجة

مارسيل :

عن العرض؟!

ميشيل.. مشمش.. ميشو.. اسمي طلع في  
الجورنال يا دودي.. كان عندك حق لما قلت لي  
إني هادخل التاريخ..

برناردو :

من أوسع أبوابه يا روجي!

مارسيل :

(يقرأ) دعونا ننظر للجانب المضيء من الأمر..  
في اعتقادي أن المرأة لن يكتب لها البقاء في  
المسرح.. عزاؤنا الوحيد أننا أمام حالة عابرة..  
حالة شاذة

!! (يضحك) يعني أنا لما أمثل حوا تبقى حالة  
طبيعية.. وهي لما تمثل حوا حالة شاذة؟!..

برناردو :

(يمزق الصحيفة) الراجل دا لازم ينضرب..

مارسيل :

للأسف ما نقدرش نضربه.. بس نقدر نرد  
عليه.. لو كان اللي بنشوفه بقالنا 100 سنة في  
المسرح دا حالة عادية.. ليهم حق يعتبرونا حالة  
شاذة.. وماله؟!.. حالة شاذة حالة شاذة..

(يبدأ استعراض بين الثلاثة)

الجميع :

حالة شاذة..

حالة شاذة..

صورة مُهتزة..

مُهتزة..

ميشيل :

اسمك إيه؟..

مارسيل :

اسمي بدل فاقد !..

برناردو :

صنعتك إيه؟..

مارسيل :

صنعتي ناقد..

برناردو :

انت حاقد؟..

مارسيل :

لا مش حاقد..

ميشيل :

انت بتدافع؟..

مارسيل :

لا.. باهجم..

برناردو :

انت بتألف؟..

مارسيل :

وباترجم..

ميشيل :

انت سادي؟..

مارسيل :

ساعات أنا بارجم..

الهواة وأشعر باللذة

حالة شاذة..

حالة شاذة..

صورة مُهتَزَّة..

مُهتَزَّة..

رايك إيه في مسرحنا؟..

سطحي..

زي شطحي ونطحي وبطحي؟..

زيهم..

اشرح..

أدي شرحي..

باكره اللي يرقص وسطه..

واللي مابيعرفش أرسطو..

مش مفيد الناس ينبسطوا..

لأ.. مفيد الناس تتأذى..

الجميع

ميشيل

مارسيل

برناردو

مارسيل

ميشيل

مارسيل

الجميع ،

حالة شاذة..

حالة شاذة..

صورة مُهتزة..

مُهتزة.."

## إظلام

( خلال الإظلام يعود صوت الراوي )

الراوي ،

على كلٍ ستتبدل الأحوال.. وسيدرك العالم  
متأخراً أن عروض ميشيل وبرناردو ومارسيل  
كان لها الفضل الأعظم في انتقال المسرح من  
حرم الكنيسة إلى الشارع.. من السماء إلى  
الأرض.. ومن الأساطير المقدسة إلى الواقع  
اليومي.. وستظهر العديد من الفرق المسرحية  
الصغيرة التي تتناول قصة آدم وحواء من  
منظور غير ديني..

## المسرح

(في ركن من المسرح لوحة كبيرة أو شاشة عرض مكتوب عليها :....

قصر ثقافة وادي السين

فرقة أبناء الأرض الطيبة خالص

تقدم

يا حوا وخبيري... ..

.. يضاء المسرح، الديكور يمثل صورة بانسة للريف

الفرنسي، ميشيل تتشع بالسواد وتجلس جوار شاهد

قبر، تبكي وفي يدها سلة، خلفها يجلس برناردو

ومارسيل في ثياب الفلاحات السوداء، الثلاثة

يتمايلون يمينا ويسارا كالتدابات، يتصاعد صوت

كورس يغني في الخلفية)

ويا حوا وخبريني يا بوي..

كورس :

ع اللي جتل هابيل.. !!!

(تندب) آآآآه يا ولدي..

ميشيل :

.....

جتله كلاب الحراسة يا بوي..

كورس :

على باب قصر النبيل..

!!!

(تندب) آآآآه يا بلدي..

ميشيل :

.....

ويا حوا وخبريني يا بوي..

كورس :

ع اللي جتل هابيل..

!!!

(تندب) آآآآه يا كبدي..

ميشيل :

.....

جتله خيو الأناني يا بوي..

كورس :

وَشَرَبَ دَمَهُ التَّجِيلَ ..

!!!

(تندب) آه يا رجلي ..

ميشيل :

.....

واني كل ما أجول التوبة يا بوي ..

كورس :

ترميني المجادير ..

!!!

(تندب) آه يا فوزي ..

ميشيل :

.....

دنيا عفشة وغرورة يا بوي ..

كورس :

ولا ترحمش الفجير ..

وخلال سنوات ستفقد قصة آدم وحواء طابعها

الراوي :

المقدس تماما .. وسيُعاد اكتشافها والتصرف

فيها بالحذف والإضافة .. لتكتسب في كل

مرة أبعادا جديدة وإسقاطات لا تعني بالقصة

التاريخية. ذا إذا كان فيه قصة تاريخية أصلا.

بقدر ما تعني بالواقع المعاش ..

(يظلم المسرح تدريجيا، مع استمرار صوت الراوي،

ثم تظهر الشاشة مكتوبًا عليها ،

رعاية الشباب والرياضة والصحة والسكان

اتحاد طلاب جامعة باريس المحطة

مكتب مكافحة النشاط الفني / أسرة البوتقة

بالتعاون مع ورشة تماثيل إسكندرية

تحت رعاية طنت زيزي...

وشووووووبش

أما بعد...

تقدم

## "آدم ملكا"

... يضاء المسرح، الديكور يمثل قصرا ملكيا، برناردو

ومارسيل في ثياب قايين وهابيل، برناردو يشهر

السيف في وجه مارسيل)

قايين.. ماذا تفعل؟..  
 مارسيل :  
 ألا ترى؟.. سأقتلك..  
 برناردو :  
 ولكنني أخوك..  
 مارسيل :  
 حسنا.. وهذا ما يجعل الحبكة الدرامية أكثر  
 برناردو :  
 إثارة..  
 (تدخل مندفعة ترتدي ثيابا ملكية، تصرخ)  
 ميشيل :  
 قايين.. ماذا تفعل؟..  
 هل أصابكم العمى؟.. ألا ترين أنني أقتله؟..  
 برناردو :  
 لكنه أخوك..  
 ميشيل :  
 ولكنه يرفض أن يعيرني حصانه ذا الخصلة  
 برناردو :  
 الذهبية  
 الجميلة..  
 ميشيل :  
 دعك من هذا.. لديك آلاف الخيول التي يمكنك  
 برناردو :  
 ركوبها  
 كيفما شئت..  
 ميشيل :  
 أعرف.. ولكن لا يوجد بينها حصان ذو خصلة

ذهبية جميلة..

(قنهار) الويل لي.. الآن فقط أدركت حجم  
الفاجعة!..

(يواجه مارسيل) هابيل.. جاء اليوم الذي تعرف  
فيه الحقيقة.. أنت لم تكن يوما أخي..

برناردو :

(مقاطعة) قايين..

ميشيل :

يجب أن يعرف..

O.k

برناردو :

لقد تبينناك طوال تلك السنوات.. وفي الواقع لم  
تكن سوى طفل لقيط بائس.. ابن غير شرعي  
ينحدر من سلالة أجنبية كانت تعيش على أحد  
الكواكب المجاورة

ميشيل :

.. المريخ على ما أذكر.. وقد عثرت عليك أُمي  
ذات يوم وهي تتفقد المجرة.. كنت رضيعا عندما  
وضعتك المريخيون داخل صندوق صغير..  
ملفوفًا بوشاح من الكتان..

برناردو :

(تصرخ، مارسيل) كلا.. إنه يكذب.. لا تصدقه يا

ميشيل :

هابيل..

(بعثف) اصمتي..

(مارسيل) لا تستمع اليه يا صغيري.. إنه يكذب..  
لم يكن الوشاح من الكتان.. بل من الحرير..

اصمتي..

(تتوسل باكية) قاين.. ألا تأخذك الرحمة بأخيك  
اللقيط.. أرجوك.. لا تخبره أيضا أننا أنفقنا  
عليه الكثير هذا المسكين..

فلتعلم أنني طالما تقت إلى قتلك.. طالما ضقت  
ذراعا بـ مارسيل ...

(مقاطعا) ضقت ماذا؟..

ذراعا..

وماذا تعني ذراعا؟

ذراعا كما تقول ذراع فولان الطريق أي قطعه  
بسرعة كأنه يقيسه.. وتذارعوا القوم الطريق  
أي تباروا في قطعه..

والأصل من ذرع أم ذراع؟..

برناردو :

لا.. ليس ذرع.. تستطيع أن تقول ذرعت  
المرأة ذراع أي خفت يداها في العمل فهي  
ذراع وذراع.. ويمكنك أن تقول ذرع المرء في  
السباحة أي اتسع ومد ذراعيه..

مارسيل :

الله يفتح عليك !!

برناردو :

وتذرع المرء بذريعة أي توسل بها.. والذراع  
في معاجم اللغة هو اليد من كل حيوان.. لكنها  
من الإنسان من طرف المرفق إلى طرف الإصبع  
الوسطى.. وعندما تقول ضاق فولان بالأمر  
ذراعا أي لم يعد يطيقه..

مارسيل :

حسنًا.. (يهم بالانصراف، لكن برناردو يستوقفه)

برناردو :

انتظر.. أنا لم انته من حديثي بعد..

مارسيل :

عفوا.. ولكنني ضقت ذراعا بحديثك.. عم كنت  
تتحدث؟..

برناردو :

كنت أقول أنني طالما ضقت ذراعا بوصايا  
والدي.. اطعم هايل.. اعطني بهابيل.. حب

لها بيل كما تحب لنفسك.. فهو أخوك الوحيد..  
أخوك الصغير.. أخوك.. أخوك.. أخوك.. لقد  
مللت هذه الأكاذيب.. لست أخي ولن تكون..  
(يضع السيف على رقبة مارسيل)

إذن.. مادمت تصر على قتلي فلتمهلني بضع  
دقائق حتى أنتهي من إلقاء مونولوج الفنال..

مارسيل :

(يبعد السيف) حسنا.. ولكن لا تطيل..

برناردو :

(أخوك أو لا أخوك) ذلك هو السؤال.. ما أنا  
إلا وغد خائر العزيمة.. (واهن الشكيمة.. مسلوب  
المشيمة..) من لي بمن يدعوني ندلا.. ويحطم  
رأسي تحطيمًا.. وينتزع شعر لحيتي.. ويلقي  
به في وجهي.. ويجذبني من أنفي.. (ويعضني  
في مؤخرتي.. ويفتصب أمني إن أمكن..) ويتهمني  
بالكذب.. ويزجي التهمة في حنجرتي حتى تبلغ  
الرئتين (مرورا بالبلعوم)..

مارسيل :

(مقاطعا) انجز..

برناردو :

(ثم يستريح قليلا.. ثم يعود لينتزع أحشائي..)

مارسيل :



استكمل المونولوج.. (يصرخ فجأة بقوة تفوق  
مقاومة إنسان في كامل صحته وعافيته) اغربوا عن  
وجهي.. اتركوني أنجرع كأس الموت وحدي..  
عليكم اللعنة.. عليكم اللعنة.. عليكم اللعنة  
برضو..

الراوي

في ذلك العصر وكما في كل عصر.. كانت  
الموضة تلعب دورا رئيسا في حياة الشعوب..  
لا سيما في المسرح.. فلا عجب إذن أن تستمر  
موضة أدم وحواء السنوات لاحقة..  
(يظلم المسرح ويستمر صوت الراوي، ثم تظهر  
الشاشة، مكتوبا عليها ....)

"اتدلي يا حوا"

للكتاب فقط

... يضاء المسرح على ديكور الجنة مجددا، ميشيل  
ترتدي جلبابا بلديا وتجلس إلى طست الفسيل،

تفصل بعض الملابس الداخلية وتنشرها على الجبال

الممتدة بين أشجار الجنة وهي ترقص وتغني

يا حلاوة الجنة يا حلاوة..

ميشيل :

يا حلو.. لو.. يا حلاوة..

(يظهر برناردو ومارسيل في ثياب الملائكة يرددان

وراء ميشيل)

يا حلاوة الجنة يا حلاوة..

الاثنان :

يا حلو.. لو.. يا حلاوة..

خلوها حلوة..

ميشيل :

يا بنات..

الاثنان :

خلوها حلوة..

ميشيل :

يا بنات..

الاثنان :

يا بنات.. يا بنات.. يا بنات..

ميشيل :

يا بنات.. يا بنات..

يا بنات.. يا بنات.. يا بنات..

.....

(يتحول المشهد إلى وصلة رقص شرقي، يصعد أحد

المتخرجين من الصالة إلى المسرح ويبعثر النقود على

ميشيل)

تدريجياً.. لم تعد الكنيسة قادرة على استيعاب  
تلك الرذائل.. ولم يفتبه أحد إلى أن تلك  
الإرهاصات سوف تتحول إلى مذاهب ومدارس  
مسرحية بعد قرون.. وسيتعلم آدم أسماء  
جديدة منها الملحمي والرومانسي والتجريبي..  
(يظلم المسرح، تظهر الشاشة مكتوباً عليها :....)

الراوي ١

فرقة اللا داعي المسرحية

تقدم

"آدم يأكل الكمثرى"

أو....

"جدلية الإنسان المعاصر بين المصل واللقاح"

للكتاب قوي

... نسمع صوت تكات ساعة رتيبة، يضاء المسرح  
على برناردو ومارسيل وميشيل شبه عراة، وكل منهم  
يتخذ وضعا ثابتا من أوضاع اليوجا)

الراوي : أما في ذلك الوقت فلم تكن هذه المحاولات سوى  
أشكال خارجة عن المألوف.. لم تتخذ شرعيتها  
بعد.. لم تكن سوى فوضى مسرحية..

(يظلم المسرح، تظهر الشاشة مكتوبا عليها ....)

مسرح الطفل المعجزة

يقدم

## حوا والكتكوت

للأطفال تحت سن 3 شهور ونص

... يضاء المسرح على برناردو ومارسيل وميشيل

يرتدون أقنعة الدجاج، ميشيل تغني والاثنان  
يرددان وراءها)

كاك.. كاك..

ميشيل :

صو.. صو.. صو..

الاثنان :

كاك.. كاك.. كاك..

ميشيل :

صو.. صو.. صو..

الاثنان :

أنا حوا..

ميشيل :

واحنا الكتاكيت..

الاثنان :

شكلكوا إيه؟..

ميشيل :

أهبل وعبيط !!

الاثنان :

مسر حكم؟..

ميشيل :

تافه وغثيت !!

الاثنان :

مين فيكم أشطر كتكوت..

ميشيل :

اللي هيجري ويقول توت..

الاثنان :

توت توت توت..

برناردو :

ميشيل :

أنا الكتكوت..

أعرف أغني وأعرف أفوت..

وأعرف أرقص.. وأعرف أشوط..

وأعرف أكلك بالشلوت..

(يتوقف عن الغناء) بس بصراحة ما بعرفش

أمثل !!

صقفوا له.. صقفوا له..

هيصوا له اليوم بطوله..

.....

(يستمر الغناء، يعود صوت الراوي ليطفئ على

المشهد، ويظلم المسرح تدريجيا)

الراوي :

والجدير بالذكر أن المسرح لم يُسهم في الارتقاء

بحياة الشعوب من خلال إعادة قراءة الماضي

والحاضر فحسب.. بل ساهم في بناء المستقبل

أيضا.. من أجل ميلاد أجيال جديدة "بتعرف

تجري وتقول توت" !!

إظلام

## القصر

(أرتفع موسيقى ملكية مهيبية، يضاء المسرح على برناردو ومارسيل وميشيل في كامل أناقتهم، يتقدمون إلى البوابة الضخمة التي اختفى من عليها الصليب وحل محله علم فرنسا لتمثل بوابة القصر الملكي)

الراوي : أما عن ميشيل، وبرناردو، ومارسيل فقد حالفهم الحظ أخيراً.. ربما كانت أقصى طموحاتهم في البداية أن يحظوا بقليل من الشهرة والمال.. لكن التاريخ كان يخبئ لهم شيئاً أكبر من هذا.. كان استدعاء رسمياً عاجلاً للبلاط الملكي..

ميشيل : أنا ما عملتش حاجة.. وكتاب الله ما عملت حاجة.. أنا أصلاً ما باحبش المسرح.. انتوا ما بتتكلّموش ليه؟.. هما هيعملوا فينا إيه؟..

ابلعي ريقك شوية.. مالك مرعوبة كدا ليه؟..

مارسيل :

وانتوا مش مرعوبين؟..

ميشيل :

بالعكس بقى أنا متفائل جدا.. لو كان فيه حاجة  
كانوا جابونا متكلبشين في حديد.. لكن دول  
باعتين لنا دعوة.. أكيد الملك سمع عننا وعاز  
يشوفنا.. ومش معقول هينزل لنا الشارع..  
يبقى مافيش غير إنه يستدعينا..

برناردو :

واضح إننا عملنا حاجة مهمة..

مارسيل :

ودا كويس ولا وحش؟!

ميشيل :

أدينا هنشوف.. المهم دلوقتي إننا لازم نستفيد  
م الفرصة دي ونحدد مطالبنا.. وأنا بالنيابة  
عن زملائنا المسرحيين كتبت ورقة اقتراحات  
لتطوير المسرح.. (يخرج من جيبه ورقة طويلة  
جدا كالفردمان) أحب أراجعها معاكوا ع السريع  
قبل ما ندخل.. أولا تكوين هيئة من المختصين  
بالمسرح هدفها....

مارسيل :

(يحاول لم الورقة الطويلة ثم يعيدها لجيب

برناردو :

مارسيل، مقاطعا) إيه يا عم انت.. دي على ما  
نقراها تكون الثورة الفرنسية قامت.. بعدين  
مش عايزين نخش تنتلط ع الراجل من أولها..  
مش كان واجب حد يستقبلنا على بوابة القصر..  
هندخل كذا من غير لا إحم ولا دستور..

ميشيل :

وانتي إيش فهمك في القصور يا جاهلة..  
دلوقتي نديله خبر ع "الإنتركم" !! (يتجه  
للبوابة ويضغط على لوحة أزرار واضحة، فتصاعد  
موسيقى الاستقبال)

برناردو :

(بنبرة آلية تختلف عن نبرته) مرحبا بكم في  
البلاط الملكي.. الرجاء اتباع التعليمات.. للغة  
الفرنسية اضغط الرقم واحد.. للإنجليزية  
اضغط اثنين.. للعربية اطلع برا.. للأسبان...

الراوي :

(يضغط على أحد الأزرار) خلاص..

برناردو :

(بالنبرة الآلية) شكرا ومرحبا بكم مرة أخرى..  
لترك رسالة صوتية اضغط الرقم واحد..  
للاستعلام اضغط اثنين.. لعبور البوابة اضغط

الراوي :

ثلاثة.. لتحميل أغنية تامر حسني الجديدة

اضد....

ثلاثة (يضغط على أحد الأزرار فتفتح البوابة،

يتقدم الثلاثة في خوف)

برناردو :

(بالتبرئة الالهية) شكرا ومرحبا بكم مرة أخرى..

نحيطكم علما أن دخول البلاط الملكي مش زي

الراوي :

خروجه !

(تفلق البوابة ويختفي الثلاثة خلفها)

(يعود إلى نبرته العادية) سيداتي سادتي..

الراوي :

نعتذر مرة أخرى عن تقديم ما حدث لأبطال

روايتنا داخل القصر الملكي.. فكما تعرفون

أن القصور الملكية ممنوع الاقتراب منها أو

التمثيل.. لذا نضطر أسفين أن نثقل عليكم

وندعوكم للاعتماد على خيالكم قليلا.. مع

تحيات نفس الرقابة العامة على خلق الله !!

(تتصاعد أصوات نباح كلاب لفترة غير قصيرة،

ثم يظهر برناردو ومارسيل مقذوفين خارج البوابة

وملابسهما ممزقة وملوثة بالدم، يحاولان النهوض،  
برناردو يتلفت حوله فلا يجد ميشيل، ينظر مارسيل  
ويهتف الاثنان في نفس اللحظة )

ميشو...٩

الاثنان :

(في لحظة يركض الاثنان إلى البوابة ويطرقاها  
بكل ما أوتيا من قوة دون جدوى، برناردو يضغط على  
الأزرار الآلية، فتعود موسيقى الاستقبال ثم صوت  
الراوي)

الراوي :

(بالنبرة الآلية) مرحبا بكم في البلاط الملكي..  
نحيطكم علما أن مواعيد العمل الرسمي تنتهي  
في الرابعة مساء.. هل سبق وقلت أن دخول  
البلاط الملكي مش زي خروجه؟! الرجاء عدم  
الضغط على لوحة المفاتيح مرة أخرى.. شكرا..  
روح لأمك !

برناردو :

(يوصل الطرق والنداء باستماتة) ميشيل..  
ميشيل..

مارسيل :

واضح إن دورنا انتهى لغاية هنا..

قصيدك إيه؟..

برناردو ،

(يخرج الورقة من جيبه يمزقها في يأس) قصدي  
ياللا بينا.. واضح إننا فهمنا غلط..

مارسيل ،

مستحيل.. أنا مش هামشي من هنا من غير  
ميشو..

برناردو ،

يا ابني انت مجنون؟.. دا ملك.. عارف يعني إيه  
ملك؟!!

مارسيل ،

ولو.. أنا عارف ميشو كويس.. (تظهر قطعة  
من فستان ميشيل مقذوفة في الهواء من خلف  
البوابة إلى الخارج دونما ينتبه برناردو) ميشو  
بتحبني.. (تسقط قطعة أخرى من ملابس ميشيل)  
ومش ممكن تبيع نفسها حتى ولو كان للملك..  
(تسقط باروكة ميشيل) دلوقتي حالا هتخرج..  
وهتشوف بنفسك إزاي ت... (يسقط السوتيان  
على رأس برناردو قبل أن ينتهي من عبارته، برناردو  
يتابع ملابس ميشيل على الأرض ليجمعها بداية من  
الباروكة وصولا للسوتيان)

برناردو ،

- مارسيل ، أنا باقول كفاية لحد كدا .. ياللا بينا ..
- برناردو ، (يخرج زجاجة الخمر من جيبه يقذفها نحو القصر  
في غضب)
- مارسيل ، بلاش جنان يا برناردو .. المرة دي مانقدرش  
نعمل حاجة ..
- برناردو ، (تبرق عيناء بفكرة) بس نقدر نرد عليه ..
- مارسيل ، مش فاهمك ؟!
- برناردو ، إيه ؟ .. ماز هقتش من آدم وحواء !!
- مارسيل ، إوعى تكون بتفكر ف ...
- برناردو ، (مقاطعا) في مسرحية جديدة .. ليه لأ ؟ ..
- مارسيل ، لأ .. لأ طبعاً .. لأ خالص .. دي فيها نفخ يا معلم ..
- برناردو ، اللي خلانا مثلنا آدم وحواء ..
- مارسيل ، آدم وحواء ماتوا وشبعوا موت من زمان .. يعني  
ماحدث منهم هيرفع علينا قضية تشهير ..  
ودا مش أي حد يا برناردو .. دا ملك .. يعني لو  
بيهزر معانا ممكن يدفننا صاحيين .. تفتكر لو

بييتكم جد هيعمل إيه؟!  
كلنا هنموت يا مارسيل..

دا انتحار بقى؟..

مارسيل :

من خمس دقائق بس كان ممكن أخاف من  
كلامك.. لكن دلوقتي مابقاش فيه حاجة أخاف  
عليها..

برناردو :

ميشو مش نهاية العالم..

مارسيل :

ما أنا عارف.. ولا أنا.. ولا انت.. ولا حتى  
الملك.. ولا أي حد.. عشان كذا مافيش حاجة  
نخاف عليها.. افكر.. من سنتين فاتوا كان  
مستحيل آدم وحواء يخرجوا من مسرح  
الكنيسة.. النهاردة كل مسرح بقى بيقدم آدم  
وحواء زي ما هو شايفهم.. احنا اللي عملنا دا..  
يمكن ما كناش نتخيل إنه يحصل لكن حصل..  
وهيحصل.. حتى لو اتدفتنا صاحيين..

برناردو :

بالعكس بقى.. لو كنا نجحنا في أول خطوة  
يبقى لازم نكمل مش نتنحدر..

مارسيل :

وأهي ثاني خطوة جت لحد عندنا.. النهاردة  
الملك أكبر من المسرح.. مين عارف.. مش يمكن  
بعد سنتين المسرح يبقى أكبر م الملك..

برناردو،

وندخل حرب مش بتاعتنا ليه؟.. يا ابني احنا  
مستلين مش فرسان..

مارسيل،

لو كان الملك دوره إنه يعرينا.. يبقى احنا كمان  
دورنا نعريه!

برناردو،

(موسيقى مناسبة، برناردو ومارسيل يفتحان بوابة  
القصر على مصراعها لتكشف عن عمق المسرح  
الذي يمثل قاعة العرش الشاغر، برناردو ومارسيل  
يرتديان ثياب الحرس الملكي، يحملان الطبول  
ويضربان عليها، تظهر ميشيل مكبله بالأصفاد،  
لتؤدي رقصة أمام العرش كالجواني، تدريجيا تتحرر  
من أصفادها ثم ثيابها أثناء الرقص، بينما ضربات  
الطبول تتصاعد أعلى وأسرع، ميشيل تحاول الهرب  
غير أن برناردو ومارسيل يضيقان الحصار عليها -  
يمكن استخدام توزيع الضوء على المسرح بطريقة  
تعكس ظلال برناردو ومارسيل بأحجام متباينة في

زوايا عديدة من المسرح حتى يكونا بخيالتهما جيشا  
من ظلال الحرس الملكي يحاصر ميشيل - حتى تسقط  
صريعة أمام العرش الذي يتقدم نحوها بهدوء كان  
قوة خفية تحركه، قبل الوصول إلى ذروة المشهد  
ودون سابق إنذار يظلم المسرح تماما ويسود صمت تام  
ثم تتعالى همهمات الجمهور، نسمع أصوات الثلاثة  
كان أحدهم يبحث عن الأخر في الظلام)

مارسيل :	برناردو؟..
برناردو :	ميشو؟..
ميشيل :	مارسيل؟..
مارسيل :	برناردو؟..
برناردو :	ميشييل؟..
ميشيل :	مارسييل؟..
مارسيل :	برناردوووو..
ميشيل :	دودييييييييييي
مارسيل :	ميشووووووووو..



## السجن

(البوابة مغلقة وقد تغير شكلها لتصبح بوابة السجن، الإضاءة شحيحة،  
تفتح البوابة من الخارج ويظهر برناردو ومارسيل وميشيل مقنوقين للمدرج  
ثم تفلق البوابة عليهم، نلاحظ عليهم آثار التعذيب، أيديهم مكتوفة خلف  
ظهورهم، وعلى عيونهم غمامات، يفتش أحدهم عن الآخر وهم يتخبطون  
في فرع)

مارسيل : برناردو؟..

برناردو : ميشو؟..

ميشيل : مارسيل؟..

مارسيل : ميشو؟..

برناردو : مارسيل؟..

ميشيل : (تصطدم بمارسيل) دودي؟.. احنا فين؟..

برناردو : (عن بُعد) انتوا اللي فين؟.. أنا مش شايف

حاجة.. أنا كنت واقف امثل ع المسرح في أمانة  
الله فجأة ماشفتش ضلمة من نور..

شكلنا كدا ورا الشمس..

(تعثر على برناردو) دودي.. هما هيعملوا فينا  
إيه؟..

هما لسه هيعملوا!!

معاك حق مايقدروش يعملوا حاجة.. الناس  
خلاص شافت العرض يعني لو جرالنا حاجة  
هتبقى قضية رأي عام

.. المهم نخرج من هنا على خير..

مافتكرش إننا هنخرج من هنا أصلا..

قال الله ولا فالك..

دي الحقيقة.. الحكاية بقت أكبر متنا بكثير..  
برناردو لما فكر في العرض كان فاكرا إنه  
بيخاطب الملك.. بس الحقيقة إنه كان بيخاطب  
كل الملوك اللي جم واللي لسه هيجوا من

مارسيل :

ميشيل :

برناردو :

ميشيل :

مارسيل :

ميشيل :

مارسيل :

ميشيل :

مارسيل : دلوقتي وإلى الأبد.. وواضح إن الرسالة

وصلت.. ودلوقتي الملك بيرد ع الرسالة..

وواضح من الرد إن الملك برضو مش بيخاطبنا

احنا.. أكيد بيخاطب كل الفنانين اللي هيجوا

من دلوقتي وإلى الأبد..

ميشيل : رسالة إيه؟..

برناردو : واضحة زي الشمس.. الرسالة إن ميشيل

وبرناردو ومارسيل لازم يتمحوا من الوجود..

مارسيل : يا نهار اسود..

برناردو : ممكن تسكتوا شوية.. خلونا نفكر في المصيبة

اللي احنا فيها..

مارسيل : المصيبة اللي احنا فيها من تحت راسك..

برناردو : مافيش داعي تحاكمني من دلوقتي.. كلها كام

يوم والقاضي هيقوم بالواجب وزيادة..

مارسيل : قلت لك م الأول دا انتحار ماسمعتش كلامي..

ميشيل : وأحلامنا؟.. والتاريخ؟.. والمسرح؟.. روما

وبرلين ولد...

(مقاطعا) زمان كنا ينحلم سوا.. من ساعة ما

ظهرت ميشيل وانت بتحلم لنفسك وبس..

يعني دلوقتي بقيت أنا السبب في كل العك دا؟

(لمارسيل) انت اللي مش قادر تنسى إن ميشيل

خدت مكانك..

أه.. وعشان كذا علمتها التمثيل بنفسي.. ها؟

يا خويا كان يوم أغبر..

أحنا أسفين يا أستاذة.. ضيعنا مستقبلك.. كان

زمانك دلوقتي حرامية قد الدنيا..

ومين سمعك؟.. طب دانا اشتغلت حرامية

عشرين سنة يا حبة عيني ما دخلتش السجن

غير لما مثلت معاكوا ! يعني أنا رضيت أدخل

السجن عشانك.. وانت اللي مش راضية؟

أوعي تكون صدقت إنك دخلت السجن بسببي

زي ما قال مارسيل.. انت دخلت السجن عشان

برناردو :

مارسيل :

ميشيل :

مارسيل :

ميشيل :

برناردو :

ميشيل :

برناردو :

عنيد.. عشان عايز تثبت لنفسك إنك كبير..  
والحقيقة إنك صغير.. وهتفضل طول عمرك  
صغير..

اخرسي..

(يحاول برناردو الوصول لميشيل كي يضربها لكنه  
يضرب مارسيل بسبب عدم الرؤية، يسقط مارسيل  
على ميشيل التي تحاول ضرب برناردو بدورها  
يتبادلان الركلات وضربات الرؤوس - بسبب القيود  
بأيديهم - ويتلقى مارسيل أغلب الضربات من الاثنين  
ليستمر الجميع في هذا التخبط لفترة أثناء الحوار  
التالي)

انت بتمد إيدك عليّ يا حيوان؟..

ميشيل :

وأفتح لك دماغك.. وأنا يعني هاتحاكم كام

برناردو :

مرة؟! (يدفع ميشيل بعيدا على أنها مارسيل) أوعى

يا مارسيل (يضرب مارسيل على أنه ميشيل)

خلاص.. جاي دلوقتي تعمل عليّ راجل؟..

ميشيل :

أنا راجل غصب عنك..

برناردو :

(يستقيث متألما من الضرب) يا شاويش ..

طوب لو راجل من ضهر راجل تقرب لي..

ورحمة أمي لو ما حظيتي لسانك في بقك  
لأبطحك..

(مثالاً) يا حكومة.. حد يخرجني من هنا..

تكونش فاكـر نفسك حاجة.. دا انت حياالله  
مشخصاتي عرة..

انا اللي عملتك بني ادمه بعد ما كنتي بتنامي ع  
الرصيف..

م الرصيف لسرير الملك يا قلب لا تحزن..

[illegible]

أنا أسف يا ميثو ..

أسف على إيه... هو كان فيه حاجة جت فيها !!  
(تتخرط في البكاء) أنا كمان أسفة... أنا خايفة...

أنا مش عايزة أموت يا برناردو.. أنا ماعملتش  
 حاجة.. وكتاب الله ما عملت حاجة.. طب لو  
 كانت آخرتها إن الواحدة تموت ببلاش زي  
 الكلبة كدا.. كان عليّ من دا بيايه م الأول؟.. كان  
 لزمته إيه يا ربي 26 سنة جوع وذل ومرمطة  
 في الشوارع لما أولها زي آخرها؟.. وكان  
 لزمته إيه أبيع نفسي لجلالة الملك لويس باشا  
 بيه !! دا أنا بعت نفسي ببلاش.. ماجابتش حتى  
 نص فرنك.. وحياة ربنا ما جابت نص فرنك..  
 يقوموا يموتوني برضو كدهون.. أنا مش عايزة  
 أموت.. أنا مش شايفة حاجة.. حد يشيل الزفتة  
 دي من على عنيا.. خرجوني من هنا.. (تركل  
 البوابة بقدميها في عنف) خرجوني من هنا..  
 (برناردو ومارسيل يحاولان الاقتراب من ميشيل)

مارسيل : اهدي يا ميشو..

برناردو : ما تخافيش.. اهدي.. اللي بتعمله دا ما منوش

أي فائدة..

ميشيل : طب نعمل إيه؟..

(يجلس على الأرض في تسليم) هنستنى..

برناردو :

(يجلس كذلك) مافيش غير إننا نستنى..

مارسيل :

(لحظات صمت والثلاثة يستندون الى بعضهم على

الأرض، ميشيل تستمر في النحيب حتى تشرع في

ترديد غنوة تشبه نواح الندابات بحس خافت)

يا ورد مين يشتريك عشان تبيع روحك..

ميشيل :

ولا من بكى لقصتك.. ولا من سمع نوحك..

(لحظات صمت)

برناردو :

أنا اللي دوري زهق من كتر تشخيصه..

أنا اللي شخصي زهق من دوره بالتالي..

(لحظات صمت)

ميشيل :

يا ورد زيك وحيدة وزيي مالك حد..

حتى الدموع ع الورق هي الندى ع الخد..

(لحظات صمت)

مارسيل :

أنا اللي قلبي يساع الكون في كواليسه..

أمنتُ بالفن من يأسف على حالتي..

(لحظات صمت)

ميشيل :

يا ورد مين علمك تدبل في برمودة..  
ياما رماك الهوا.. ماجتش من موة..  
(يتداخل الغناء)

شفت القمر في السما قلبي اتخطف مني..  
برناردو :

يا ورد مين يشتريك عشان تبيع روحك..  
ميشيل :

أبيض تقولشي ملاك.. أسمر تقول جني..  
برناردو :

مسرح أونطة ومزاد داير على جروحك..  
مارسيل :

يا بكرة مالك معاند؟.. فيك شبه مني؟..  
برناردو :

بكرة الزمن يبتسم مرة على ميلي..  
ميشيل :

وكانه سايق علي الحب.. وكأني..  
برناردو :

بكرة باريس كلها هتغني مواويلي..  
مارسيل :

.....((ياخذ الغناء في الخفوت)).....

لم يستمر الانتظار طويلا حتى تم تنفيذ حكم الراوي :

الإعدام في كل من ميشيل، برناردو، ومارسيل

بأوامر ملكية بناء على قائمة من التهم المنسوبة

اليهم تبدأ بتهمة العيب في الذات الملكية ولا  
تنتهي.. سيداتي سادتي.. كم وددنا أن يلقي  
أبطال روايتنا مصيرا أفضل.. غير أن النهايات  
السعيدة تتطلب مقدمات سعيدة. ونتبين من  
تلك النهاية لماذا تم تجاهل سيرة أبطالنا الثلاثة  
من قبل المؤرخين.. وإن كان ذلك لا ينفي حقيقة  
وجودهم.. بقدر ما يؤكد وجودهم على مسافة  
ما من التاريخ.. من المؤكد أنهم عاشوا..  
تخللوا.. وأبدعوا عروضاً جديدة لم تلق سوى  
مزيد من الفشل.. لكنهم لم ينجحوا في التكيف  
مع عالمهم.. لقد حاولوا على أي حال.. غير  
أن القدر لم يمهلهم لاستئناف المعركة الأزلية  
التي استمرت لقرون لاحقة وصولاً إلى عصر  
النهضة.. إن تاريخ الثلاثي ميشيل، برناردو،  
ومارسيل لم ينته بعد.. بعبارة أخرى إن  
تاريخهم لم يبدأ بعد.. وفي قرون لاحقة سيشهد  
العالم ما تركوه من أفكار مضيئة..  
إظلام تدريجي

نقترح على أصحاب القلوب الضعيفة مغادرة  
المسرح قبل تنفيذ الحكم.. أما أصحاب القلوب  
القوية فنطمئنهم أن مراسم الإعدام ستمر  
سريعا حتى أحكي لكم حكاية صغيرة لا تتعلق  
بسياق روايتنا.. للتخفيف من وقع المشهد..  
وإمعانا في الخروج عن النص..

## ختم

(يضاء المسرح تدريجيا على نفس المكان، ميشيل، برناردو، ومارسيل يتقدمون الى مقدمة المسرح بخطوات ثقيلة وهم مقيدون ومغمضون كما هم، بينما يتدلى من سقف المسرح تدريجيا ثلاث مشانق، يرتقي كل منهم مستوى مرتفعاً عن الأرض يمثل طاولة الإعدام، حتى تصبح رؤوسهم داخل المشانق، أثناء ذلك يستمر صوت الراوي)

قبل خمسة وستين مليون عام من الآن اصطدم بكوكب الأرض نيزك ضخم ليأذن بنهاية عصر الديناصورات العملاقة.. كان للحيوانات الناجية من الانقراض سمة واحدة مشتركة.. وهي ضالة حجمها.. لقد أبيد كل حيوان يزيد وزنه عن عشرة كيلوجرامات تقريبا ليظهر عالم جديد من المخلوقات الصغيرة تدعى الثدييات.. والتي استطاعت في غضون عشرين مليون عام وبفضل قدرتها الخارقة على التكيف التكيف فحسب.. أن تحكم الأرض، وشكرا..

(تسقط الطاولة من تحت أقدام الثلاثة، هتتارجح أجسادهم في الفراغ

حتى تفارقهم الروح)